


बुँगद्यो नेपाले हःगु खँ

(नेपाल भाषाया वंशावली मणिरत्न मालाया छगू अंश)



लेखक व प्रकाशक:-

पं. वै. आशाकाजी वज्राचार्य

बुँगद्यो नेपाले हःगु खँ

[नेपाल भाषाया बंशावली मणिरत्न मालाया छगू अंश]

लेखक तथा प्रकाशकः—

पं. वै. आशाकाजी वज्राचार्य

ल० पु० नकवहिल, अथननी ।

संशोधकः—

पं. ज्ञानरत्न वज्राचार्य

का० पु० कोछेँ, लायकूसाः ।

नेपालभाषाया हस्ताक्षर महुगु सफू खुया काःगु थहरे ज्वी ।

पं. वै. आशाकाजी

लेखक व प्रकाशक:-

पं. बै. आशाकाजी वज्राचार्य

प्रथम संस्करण २०१४ साल-५००

द्वितीय संस्करण २०२४ साल-१०००

तृतीय संस्करण २०३६ साल-१०००

चौथो संस्करण २०३७ साल-१०००

पञ्चम संस्करण २०४२ साल-१०००

~~~~~  
§ स्वर्वाधिकार सुरक्षित §  
§ ~~~~~

(थ्व सक् लेखकया अनुमति बिना प्रकाश याय्गुलि निरोध दु)

कलिगत सम्बत् - ५०८६

बुद्ध सम्बत् - २५२६

नेपाल सम्बत् - ११०६

विक्रम सम्बत् - २०४२

आःगु थाय्:-

बागमती छापाखाना

यल। फोन नं. ५-२१८४७



**लेखक:- पं.वै. आशाकाजी वज्राचार्य**

**करुणामयया संक्षिप्त परिचय,  
महायानसूत्र गुणकारण्ड ब्यूह प्रमाण ।**

## **बुद्धोपदेश**

येन येनैव रूपेण सत्त्वायात्ति विनेयताम ।

तेन तेतैव रूपेणस्थितोऽहं लोकहेतवे ।

गन गन सुनां सुनां छुः छुः धका नाम काल, अन अन, उह्य  
उह्य यात, उगु उगु रूपकया सत्व प्राणी पिन्त बोधयाना दर्शन  
बियानं दुःख फुका सुःख याना लोकपिन्त हित सुख याय्गु  
कारणे बखत विचार याना स्थान स्थानान्तरे भ्रमण जुया चोना  
धका करुणामयं धया बिज्यार्थे जिनं भ्रमण जुया लोकपिन्त  
हितयाना जुया ।

बुद्धरत्न धर्मरत्न संवरत्न श्व स्वंगु रत्नयात त्रिरत्न धाइ ।  
श्व स्वंगुलि संघरत्न धयाह्य संघनायक लोकेश्वर करुणामय खः ।

मह भूमी १२ वर्षया जलबृष्टि मजुया अनचोपि प्राणीतय्  
लःतोनेगु नेगु मदया हाहाकारं दुःख जुया खोया जुगु सह याय्  
मफ्य्का करुणातया भ्रमर (भमः) रूपजुया उगु देशे द्वाहावना  
त्रिरत्न नामकया बोयाजुल । अन चोपि लोकपिसं भमःन धागु  
न्यना सकसिनं त्रिरत्न शब्द उच्चारण याना हाला जुस्येलि जल  
बृष्टि जुया अन चोपि प्रणी सकल या दुःख शंकष्ट फुना सुख  
प्राप्त जुया उद्धार जुल ।

(आ)

बलि राजां तस्सकं अभिमान याता दान यावले अभिमान  
तोडे याय्त् बिस्नु बागःचाह्य रूप कया पला निपला जि इच्छा  
दु थाय् तेगु विइला धका फोंवले निपला जक छाया सोपला जुल  
छं इच्छा दुथाय्ति धाल-खुसिजुया ब्राह्मण रूप तोता स्वपातुति  
दुह्य भयंकर रूप जुया छपा तुति स्वर्गधका आकशे पलातया,  
छपातुति मर्त्य लोके पलातया, छपा तुति छंगु छयने तेगु धका  
छयनेन्हुया सप्त पाताले छोया बिल । बलिराजा न्हिन्हि खोया  
चोंगु शब्द न्यना सहयाय् मफय्का सप्त पाताल थ्यंक करुणामय  
बिज्याना बोधिज्ञान कना अभिमान मदय्का सप्त पाताले चोने  
म्वाक थत हया उद्धार यात ।

अवीचि नरके चोंपि पापि ते दाह जुया न्हिन्हि खोया चोंपिन्त  
करुणातया करुणामय यमलोक अवीचि नरके वना मिस्याना  
शीतल जुइका उगु नरके चोने म्वाक त्रिरत्न नाम काय्का उद्धारयाना  
बिज्यात ।

प्रेत लोकपिनि लःतोनेगु मदया न्हिन्हि खोया जूगु शब्द ताया  
करुणाय मान करुणामय प्रेत लोके वना थःगु शरीरं जल वृष्टियाना  
प्रेत सकलयात लःतोंका निपा थ्यंक लःतोने दय्का प्रेत पिन्त  
उद्धार याता बिज्यात ।

ताम्रद्वीपे चोंपि लःसीतय् पुरुष मदया कामातुर जुइका लाको  
पाको हाला सना नया जूगु सीका करुणातया करुणामय बांलाह्य  
पुरुषया रूपकया ताम्रद्वीपे वना अनचोंपि सकल लसीतय्त्  
पंचशीलया खंकना बोधयाय् धुस्येंलि सत्यकबल याका योयोथे  
सना हाला ज्वीगु तोफीका त्रिरत्न नाम काय्का षडक्षरि मंत्रदान

( ३ )

बिया उगुरूप तोता थःगु करुणामय रूप वयना उद्धर यानस बिज्यात ।

कबिकुमार बालकयात सुदासब्याधां स्याना लानयत्त वाणंकय-  
केत तयार यावले करुणादुह्य करुणामयं माठर विद्या धर छोया  
हया अकाल मृत्यु भयं तरेयाना बिज्यात ।

कबिकुमार सिंहल सार्थवाह धाय्का जन्मकया दुःख  
भोगयाना वयाम्ह मेपिमखुः जिगु ह्यापाया जन्मखःधया बिज्यागु  
जातक मालास उल्लिखित दु ।

**हानं जारीम लामागुरुया उपदेश थथ्ये दुः**

तथागत पिसं पलातया विमज्यागु उत्तर हिमगिरि पर्वतया  
संनिधाने बिज्याना देशे प्राणीपि उत्पत्ति जुइका नवरत्न लुं, बह  
अनेक धन तथा नेगु तोनेगु (बुया वइगु) पुसा बिया लोकपिन्त  
षडगति चक्रेलाना दुःख मजुइगु धर्मोपदेश न्यंका षडक्षरि मंत्र  
दान बिया महायान उपाय कुशल मूल धर्मया चर्या याका प्राणी  
उद्धार याना बिज्याह्य, सुवर्णमय सुखावती बुद्ध भुवनं पोतल  
पर्वते बिज्याह्य अमिताभ आदि बुद्ध तथागतया मूलह्यशिष्य  
लोकेश्वर करुणामय खः ।

एवं प्रकारं आपालं महायान सूत्र सोया कर्मध्यांजे बोधिसत्त्वं  
संग्रह याना तगु सद्धर्मसूत्र—अवतारि जारीम लामा (गुरुं) २०३५  
साल श्रावण महिनास ल.पु. हिरण्य वर्ण बिहर (गुम्वा) स  
बिज्याना महायान बुद्धधर्म प्रेमपि श्रदालु पिन्त आज्ञादयका  
बिज्यात ।

(ई)

बर्तमान नेपाल देशे आर्य अष्टांग मार्ग ह्यसीका यंकेगु दश शील धारण याना । प्रथम त्रिरत्न शरण बुद्ध पूजा, द्वितीय अमोघपाश लोकेश्वर करुणामय पूजा, उपोषधव्रत विशेष अष्टमी दिने याना—आमीष वस्तु नेगु तोनेगु आहार सुरतिया कुं तोना ह्योय्गु समेत्—गुरु शिष्यपि व्रतजन सकसिनं वर्जित याना श्व उत्तमोत्तम महायान बुद्ध-चर्य खःधका सीका षडगति दुःखं मुक्त जुया मोक्ष प्राप्त जुइगु, ज्या-स्वभाव शुद्धिपि गुरुपिसं बांलाक उपदेशविया याकाचोन ।

गुह्यजा श्वसपोल करुणामय लोकेश्वर यागु रथ जात्रा दय्दसं चैत्र महिनाय् येंदेशे—बैशाख महिनाय् यलदेशे याना बयाचोंगु सकसिनं खना सिया चोंगु खः ।

श्रद्धावान् पिसं भक्तितया पूजा पाठ बन्दना याना वै चोन ।  
श्रुगु पुण्यं प्राणीपिनि पाप मोचन जुया पुण्य प्राप्त जुइमा ।

—लेखक



## इनाप

कौगु थ्व नेपाल देशे गथेदत, सुनांदयकूगु धाइ । ह्लापा सत्ययुगे थन लखं तोपुया चोंगु (नागवास) धेंगु पुखू खः थथे कालिदहं जुया चोंवले विपश्चिभगवानं पलेपुपिना उत्पत्तिजूगु पलेस्वाने स्वयंभूत्पत्ति ज्वीधुस्यंलि महाचीनं बिज्याह्य ऋद्धिवन्त महामंजुश्री गुरु थन विज्याना, माहायानचर्यया ऋद्धि थाय्थासे लःछोना थ्व देश दयका, सकल मनुष्ययात सेके सीके बीया लागी रञ्जनादि अनेक लिपि आखया शास्त्र थमं चोया स्यना विज्याह्य महागुरु जुया निति थौतकनं सकसिनं (ॐ नमो वागीश्वराय) धका व्वना ॐ गुरु जुया विज्याह्य वागीश्वराय वचनया ईश्वर मंजुश्री वसपोल गुरुयात नमः नमस्कार धका विद्यारम्भ याना चोनतिनी । मंजुश्री गुरुया मां वौ सु ? गुवले गन जन्म जुह्य थ्व खं महायानचर्या जक ह्यसी थुजोह्य गुरुया शिष्य षट्शास्त्री बौद्ध साहित्याचार्य गुणाकर वज्राचार्य व शान्तिकर वज्राचार्य, शान्तिकरया शिष्य ये देशे चोंह्य बौद्धावदान तान्त्रिकाचार्य ऋद्धिसिद्धिवन्तह्य वन्धुदत्त वज्राचार्य खः । उगु समय थ्वसपोल व ख्वप देशया नरेन्द्रदेव जुजु, यल देशया रथंचक्र कृषक, कर्कोटक नागराजा समेत प्यह्य वना कामुनी क्षेत्रं नेपाल क्षेत्रे श्री करुणामय ह्या बिज्यात ।

वसपोल करुणामय सुखावता भुवनं व्वहाँ विज्याना मर्त्यमण्डले सकभनं अन्नदयका लोकपिन्त प्रतिपालयाना सुखबीया लागी व षट्गति संसारया हेतु याक्यें मुक्त ज्वीगु थथे धका वयनेया लागी यक्षलोके जन्मकया विज्यागु खः ।

(ऊ)

(बुद्ध वचन) भक्त्याहं वाचयामि प्रणमित शिरसा तं  
महायान सूत्रम्—जि ह्यापा नेपाले कान्तिपुर नगर (थबही) स  
सिंह साधवाह महाजन धायका जन्म कयावले न्यासःह्य वणिजाल  
गणपि मुंका (सिंहल द्विपे) व्यापार यावना, लसीतेसं जिमित  
स्याना नेत थिक यात, उगु बखते जि करुणामययागु भक्ति  
यानागुलि स्याय् मफुत, लिहाँ वया लिपा थःहे जुजु जुया बुद्धया  
मूल सिद्धान्त महायान धर्मया शस्त्रं लसीतेत त्याका, नेपाल देशे  
सकभनं प्रजापिन्त अष्टमीव्रतया स्वामी करुणामयया सेवा याका  
थमनं नित्य सेवा याना न्हापा लसीतेसं स्यायत्यंगु लुमंका धन्य  
धन्य श्रोककरुणामय जितः रक्षायात धका बसपोलयागु षडक्षरि  
महामन्त्र सोंगुकोटि वोना वया । जितःन्हापा जन्म जन्मपति  
रक्षायाना विज्याह्य संघरत्न करुणामय खः । जि न्हापा जन्म  
जन्मपति श्रावकंच्वे महायान धर्म चोना भक्तिपूर्वक गुणवर्णन  
याना जिगु शिरं करुणामययास नं महायान तन्त्रराज सूत्रयात नं  
वन्दना यानाचोना । उगु महायान धर्मया पुण्य नेपाल देशया  
सिमाना लुम्बिनी उद्यानस जन्मजुया थौं बुद्ध ज्वी धुन ।

(किन्तु) महायान धर्म व करुणामय म्हमसिल धाःसा  
दान पारमितादि पूर्णयाय फेमखु, हानं गुरु ज्वीगुल छाया शिश्यहे  
ज्वी फेमखु, थुजोगु छुं मसिका भिक्षु वा बुद्धोपासक जुया चोने  
बैंगु नं धिकार खः धका बुद्धं धयाविज्यागु खँ गुणकारण्डब्यूह  
सूत्रे दु । थुजोह्य करुणामय नेपाले बिज्यागु वंशावली संक्षिप्तरूपं  
नेपाल भाषां चोया प्रकाशयाना थुकी गन गनं द्वेनेफु, सोया  
सोया वोना बिज्याई—दीपिसं सचेयाना वोना बिज्याई—दी बैंगु  
आशा दु ।

—लेखक व प्रकाशक

श्री

मङ्गलाचरणम्

सुखावतीस्थं लोकेशं षड्भति दुःख तारकम् ।  
नरक संशोधनं देवं नौमि श्रीकरुणामयम् ॥

# बुँगद्यो नेपाले हःगु वंशावलिया खँ

प्रारम्भ

श्री परमेश्वर लोकनाथयात नेपालमण्डलस  
बिज्याका रथ जात्रा दयका तःगु श्री करुणामय  
यागु खँ संक्षिप्तरूपं कनेत्यना ॥

[ थ्व खँ गथ्ये धाःसा ]

ह्लापा थ्व नेपाल मण्डलया खप (भक्तपुर) देशे  
गुणकामदेव धैम्ह जुजु छम्ह दु, थ्व जुजुयाके न्याय नीति  
विवेक विचार आपालं दु, हानं धर्मात्मा सत्यधारी

पराक्रमी गुणैश्वर्य दुह्य, श्व जुजुं नित्य धर्मया तुतामं  
चुया प्रजागणपित थः काय् म्हाय् तुल्य प्रतिपाल याना  
चोन ।

श्व जुजुया काय् मचा मद्रु, म्हाय् छम्हजक दु,  
श्वया नां गुणलक्ष्मी मैजां श्व मैजां स्वीनिता ३२ लक्षणं  
पूर्णम्ह अति सुन्दरी सुलक्षणी खः । श्व मैजा मचाबले  
छम्हु तच्चोकं ताउति हे खोल, सकसिनं अनेक प्रकारं  
हेकल नं सुनानं दिक्के मफु, लिपा अबुह्यसे धोँयात बिया-  
छोये धायवं खोगु दित ।

कथं थें श्व गुणलक्ष्मी युवती जुस्यंलि बैकुण्ठया  
मालिक नारायणं गुणलक्ष्मी मैजाया स्वप्नस थःगु रूप  
दर्शनबिया माक्व भरोसाबियालि श्वहे रात्रिया नसंचास  
तुयूम्ह धोँया रूपकया थःपरिवारपि मुंका जुजुया छें  
क्वसं चोना बिशब्द बिशब्दं हाला चोन ।

जुजुं श्व धोँत बथानवया हाःवगु सोया मनस त्रास  
जुया ज्योतिष सःता प्रश्न विचारयाका खँ न्यन । ज्योतिषं  
धाल, श्व धोँत हावगु भिगु खः, छुं हे मति त्रास कायम्वा ।  
(किन्तु) छःपिसं धोँयात छुं बी धागु दै, व मब्यूगुलि  
थन वया हाःवगु खः धका बिन्तियाना बेलाकया  
लिहाँवन ।

जुजुं ज्योतिषया वचन विश्वासयाना धोंया माली-  
कह्य तुयूम्ह धों सःता न्यन । हे जम्बूक ! थन छिपिं छाया  
हाः वैगु, कारण छु ? तुयूम्ह धोंनं धाल-भो राजन् !  
छलपोल सत्यबादि खःसा जितः छलपोलया पुत्री कन्या  
दान बिया जिलाजं या, सत्यबादी मखुसा याय म्वा ।

जुजुं आज्ञा जुल-मनुष्यया मचा नं जम्बूकयात  
कन्या दान बीला, गुजोगु आश्रयया खँ ।

धों नं धाल-छूं आश्रयया खँ मखु, उबले छलपोलं  
धोंयात बी धका धैगु मखुला ? जि ताः ।

धोंनं थथे धाःगु न्यना जुजुया मती कासांक वना  
चिमिसँ बोह बोहँ जायका अहो ! गुजोगु हेतु जुल, जि  
म्हाय् खोबले दिकेमफया काचाक धोंयात बिया व्हे  
धका ख्यालं धैगु आःधात्थे हे नी जुया धोंत वया धाःवल  
थ्व छु धैगु ल्याः धका छुं खेद मनयाना कोथाय् वना  
थःस्त्री रानी नाप सल्लायाना निम्ह स्त्री पुरुषयां दुःख  
मन याना चोन ।

थनंलि थुगु खँ गुणलक्ष्मी मैजां सिया मां बौ चोना  
चोंगु कोथाय् वना मां बौयां खाःसोया बिन्ति यात ।

भो माता पिता ! थौं छाया दुःख मनयाना खा  
खिउँका चोना बिज्याना, छु जुल ? जित धया बिज्याहुँ ।  
थथे थःपुत्री गुणलक्ष्मी मैजां विन्तियागु न्यना मां बौ  
निम्हस्यां पुत्रीयागु रूप लक्षण खना नुगः मछिका दुःख  
मन याना धौंत वया धागु खँ कना बिलापयाना चोन ।

श्वबेलस गुणलक्ष्मी मैजां हानं विन्तियाना धाल ।  
भो पिता ! जिगु विन्ति छगू न्यना बिज्याहुँ थुकि यागु  
खँ जित स्वप्नस क्यने धुंकल, छलपोल सत्यबादी छल-  
पोलं थःगु सत्य वचनयात प्रतिपालयाना जित श्व तुयूह  
धौंयात कन्या दान बिया बिज्याहुँ मती विषाद याना  
बिज्याय मते । थौं हे स्वयम्बर याना जि वनेगु जुल ।

पुत्रीयागु बचन न्यना निम्हत्यपू नं पुत्रीयागु ज्ञान,  
धौंतेगु चरित्र श्वीका नुग मछिका मन्त्री सःता सल्ला-  
याना प्रजागणपिन्त बोधयाना, कन्या दानयात विधि  
पूर्वक सारदाम तयारयान, गुरु पुरोहित आदि प्रजा-  
गणपि सकलें निमन्त्रणा याना पुत्रीयात स्नानयाका तिल-  
हिलं तीका, थःगु चुके नाना मङ्गलोत्सव याना धौंत  
दुतबोना, शुभ-बेलास तुयूम्ह धौंयात स्वाँमालां कोखा-  
यका स्वयम्बर याना, गुणकामदेव राजां थःपुत्री गुण-  
लक्ष्मी राजकुमारी तुयूम्ह धौंयात कन्या दान बिया माःगु  
ज्या सिधय्का बिज्यात ।



थनंलि धौं जिलाजं व पुत्री निम्ह रथस च्वंसैली  
 धौंत प्यह्मासै रथ सालायन, जुजुं पुत्रीनाप माक्व खँल्लाना  
 भरिया तय्त कोसः क्वबीका ल्यूल्यू छोया तयके छोट ।  
 ववं बनांतरे थ्यन छगू गुफाया होतं दुने दुतयंकल,  
 भरियानं ल्यूल्यू द्वहाँ वन । नारायणं थःगु मायां सो  
 सोकि सोय मगागु रत्नमय सुवर्णया प्रासाद ( दरवार )  
 छगू उत्पत्ति याना थ्वहे दरवारे यना दुने चुके थ्यस्यैलि  
 धौंत दक्व अल्पेजुया वन, धौं रूप नारायणनं थःगु  
 रूपकया मणिमय सिंहासने निम्हं च्वना बिज्यात ।

तुरन्त देवतादि ऋषिमुनिपि वया यज्ञशाला दयका वेदसहित होमयाना कलशाभिषेकबिया होंका विवाह कर्म सहभोजननादि ज्या सिधयेका सकसितं भोजन याकालि भरियातयत् तयानकुगु सुबर्णया भु म्हांति छपा छपा अमिततुं बिया लितछोया हल । भरियात वंपि लिहाँवया अनजूगु खँ फुक जुजुयात बिन्तियाना लिहाँ वन ।

थनंलि जुजुया मती नारायण दर्शनयावनेगु इच्छा-जुया भरिया नायकसमेत मन्त्री प्रजागणपि मुंका वंगु बखते अन गुफास द्वाहाँ वनेगु हो मलू, लिपा मन्त्री प्रजागणपि छखेलासेलि हो लुया भरिया नायक व जुजु द्वाहाँ वना सोबले नारायण दर्शनलाना धन्यधन्य जि भाग्य जिगु म्हाय्या कर्म धका बिन्तियाना सोचाहुला प्रणामयात ।

नारायणं आज्ञाजुल । सत्यबादि समुरपिता, धन्य छलपोल छलपोलखना जि खुसिजुल, आः जि थन आपाः चोनेमज्यू स्त्रीनं सहितयाना वैकुण्ठस वनेत्यल उकिं छपित बरदान छगू बी छु फोने याकनं धया विज्याहुँ । जुजु बिन्तियात भो नारायण ! छलपोलयाके बरदान फोनेत थन जि याकचैगु बुद्धि छु फोने, जि प्रजागणपिके न्यना फोंवये धका बेलाकया पिहाँवसेलि



पिने मन्त्री प्रजागर्णपि नापलाना सकलें लिहाँवया  
जुजुं बुढा पाको प्रजागर्णपि सःता न्यन ।

भो प्रजागर्णपि ! जित नारायणं बरदान बी धाल  
जि छु फोने ? बुढा पाको प्रजागर्णपिसं बिन्तियात ।

भो महाराज ! ऊ नेपाल देशे वा बाली छता  
मदु वहे वा बाली फोना बिज्याहुँ । थथे बुढापाकोयागु  
बिन्ति न्यना जुजु नारायणथाय् वना वाबाली फोन ।

नारायणं आज्ञा जुल । भो ससुर पिता ! थोकु  
धाल तथाऽस्तु जि बी धुन, तर मगध देशे वा पुसा  
काय्के छोया जेष्ठ शुक्लया अष्टमि धुनेव वा पुसा  
तय्का अषाढ मासस वा मा पिकेब्यु । हानं बखत बखतस  
जल बृष्टि ज्वीकेत नांग सन्तोष यायत, देशे बिध्नोपद्रव  
मदयकेत कोट्याहुति लक्षाहुति आदि यज्ञ होमार्चनया ।  
जुजुं तथाऽस्तुधया बेला क्या लिहाँ वल ।

थनंलि जुजुं नारायणया आज्ञार्थे मगध देशे वा  
पुसा काय्के छोया सकल प्रजागर्णपिन्त वा पुसा इना-  
बिया जेष्ठ शुक्लया अष्टमि धुनेव शुभ बेलास वा पुसा  
तल, अषाढमास जुसैलि सकसिन वामा पित । उगुसमये  
वखत बखतस जल बृष्टिजुया वा मा तमा जुया वल,

प्यला न्याला दसेलि वा पाके जुल, सकल पूजाया हर्ष-  
मान जुया धन्य धन्य की जुजु धका प्रसंशा याना च्वन ।  
क्रमर्थे सकस्यां वा लया दाया सोगु बखते वायादुने मुख्य  
माःगु जाकी मद्रु ।

प्रजागणपिं सकलें हरेस नया स्याफगु वा ज्वना  
जुजुयाथाय् वना बिन्तियात । भो महाराज ! गुलितक  
दुःख सिया वा पिना बिचायाना चोना, आ वा लया  
दाया सोयां वाया दुने जाकी मद्रु, गथेजुल सोया बिज्याहुँ  
धका सकसिनं स्याफगु वा क्यना लिहाँ वन ।

जुजु वा खना आश्चर्यचाया वाया दुने जाकी मद्रुगु  
स्याफगु वा छु यायत ज्यू, द्वीतजक जिल नयत मजिल,  
आः गथे यायगु थ्व खँ न्यनेत जिलाजं नारायणयाथासे  
वने माल धैगु बिचारयाना पूजाया सामाग्री जोना हानं  
वन । अनथ्यसेलि नारायणयात चाःहुला प्रणामयाना  
पूजायाना बिन्तियात । भो नारायण ! छलपोलया  
आज्ञार्थे वा पूसा कायके छोया वा षिका सोयां वाया  
दुने जाकी मद्रु वा फुक स्याफजक जूगुलिं जि प्रजागण-  
पिनि परिश्रमयाक्वं व्यर्थ जुया जिथाय्वया धाःवल,  
जिं छु यायगु, वाया दुने जाकी दयका बिया बिज्याहुँ ।  
थथे जुजुं धागु खँ न्यना नारायण खछि सुंक चोना  
उत्तर बिल ।

भो ससुर पिता ! वा पिना सयेका बीगुजक जिगु कर्ता खः, वाया दुने जाकि दयकेगु कर्ता जिगु मखु । अन्नया मालिक जिनं गुरू विधाता श्रीमद् आर्य अवलोकितेश्वर करुणामय दनि, वसपोलं जक वाया दुने जाकि दयका बिज्यायफु, मेपिसं मफु । वसपोल प्राणिपिन्त रक्षा यायया कारणे ३२ स्वी निगू अंशया छगू अंश थ्व पृथ्वी मण्डले कामुनि धंगु क्षत्रे यक्षणीयागु गर्भं प्रकत जुया अनचोंपि यक्षतय्त उद्धारयाना नेपाल बिज्याइ, अले थननं सकभनं सुभिक्ष जुया महामङ्गल ज्वी, वाया दुने जाकिनं दै । थुकिया कारण गथे धाःसा—

ह्लापा कामुनि क्षत्रे चोंपि यक्षगणपिन्त रक्षा यायया कारणे श्रीकरुणामय मनुष्यया रूपकया अन बिज्याना पञ्च शील अष्ट शील बोधिचर्या ब्रत धर्मोद्देश बिया बिज्यात । अथेयानिति अनयाम्ह जुजुया स्त्री यक्षणी नं आपलं ज्ञान बुद्धी लाना अहिंसा धर्मस चोना पुण्य साधना यानाचोंगु दु । उकिं वसपोल अन जन्मकया प्राणिपिन्त उद्धार याना बिज्याइतिनि । वसपोल थन नेपाले बिमज्यायकं वाया दुने जाकि दै मखु । छु याये छलपोल यागु आयुर्दा मलात छलपोलया कायेया पाले जि नं कोशिस याना श्रीकरुणामय नेपाले बिज्याकेगु ज्या याये । उगुबखते तिनि वाया दुने जाकि दै, हतासचायमते

श्री करुणामय स्मरण याना अष्टमी ब्रत याना न्याय नीति  
धर्मस चोना प्रजागणपिन्त प्रतिपाल याना चवँ । जि गुप्त  
जुया वनेत्यल धका थुलि आज्ञा जुया बेलाबिया लित  
छोया हल ।

जुजु लिहाँ बया प्रजागणपिन्त थ्व हे खँ कना चित्त  
बुछे याना श्रीकरुणामय स्मरण याना अष्टमी ब्रत दना  
चोचों धर्मया प्रभावं पुत्र सन्तान दत । थ्व हे पुत्र यात  
नरेन्द्र देब धका नामकरण याना न्याद दस्यंलि बिद्यारम्भ  
याका अनेक लिपि शास्त्र बिद्या ज्ञान गुणं पारंगत जुया  
ल्यायम्ह जुस्यंलि छन्हु शुभ बेलास थःपुत्र नरेन्द्रदेबयात  
राज्याभिषेक बिया माक्व खँ कना श्रीकरुणामय यागु  
सेवा तोते मते सदाकालसं भक्ति याना चवँ धका उपदेश-  
बिया प्रजागणपिन्तनं भरोसाबिया गुणकामदेव राजा  
आनन्दं तपोवन प्रवेश जुया बिज्यात ॥ ॥ थुलि  
गुणकामदेव राजा यागु संक्षिप्त खँ जुल ॥ ॥ शुभम् ॥



## थनंलि साहु महाधन यागु खँ

छगू समय गौड धयागु नगरे बोरबाहु राजाया पाले  
सुमति धेम्ह साहु छह्य दु, महाधनाद्य, उकिं थ्व साहुयात  
सकसिनं महाधनधका आपालं नां प्रचलित जुया चोन ।  
थ्व साहुया धन सम्पति छे बूँ, सुवर्ण रत्न, अन्न बस्त्रादि  
आपालं दु, पशुपंक्षी दास दासी न यक्व दु, केबल सन्तान  
छता मदुगुलि छन्हु निम्ह तिपुया खँ जुल ।

हे स्त्री ! की थुलिमछि धन सम्पति दु, सन्तान  
छता मदु, धन सम्पति दुथ्ये सन्तान छतनं दुगु जुसा  
गुलिजक आनन्द ज्वीगु खः । छुयाये की सन्तान मदु,  
धिक्कार कीगु कर्म । आःकीसं सन्तानया लागि श्रीकरु-  
णामय स्मरणयानां महाउत्तमगु उपोषधधैगु अष्टमीव्रत  
याय्नु धका सल्लाहयाना दम्पतिसहित गुरु पुरोहित  
तया अष्टमीव्रति व्रत दना पुण्य याना च्वन ।

थनंलि छन्हुयादिने करुणाया अधिपति श्रीलोकेश्वरं  
थ्व साहुया स्वप्नसदर्शन बिया आज्ञादयका बिज्यात ।  
हे सार्थवाह ! छंगु भाव भक्तिखना जि सन्तोष जुल, छ  
छु कामना याना व्रत दना ? साहुं बिन्तियात ।

भो प्रभु श्रीकरुणामय ! छलपोलया कृपां जित धन सम्पत्ति अन्न वस्त्र सकतां परिपूर्ण जुया चोन केवल सन्तान छता मद्रु, जित मृत्युकालस अग्नि संस्कारयाना जल दान, अन्न दान, पिण्ड दान याइम्ह पुत्र छम्ह बरदान बिया बिज्याहुँ धका फोन ।

श्रीकरुणामयं आज्ञा जुल । हे सार्थवाह ! छंत सन्तान बरदानबीह्य महासिद्धा । (फकीर) छम्ह थनि ४ प्यन्हु छं थाय् भिक्षा फों वई वं छन्त बरदान बी धका, आज्ञा दयका अन्तर्ध्यान जुयाबिज्यात ।

थनंलि साहु महाधनया न्ह्यलंचासैलि मनस भालपु अहो आश्चर्य थौं जित श्रीकरुणामयनं स्वप्नस दर्शन बिया सन्तान बरदान बीह्य सिद्धा थनि ४ प्यन्हु वै धका आज्ञा जुया बिज्यात । थौं जित स्वप्नस गथ्ये क्यंगु खः अथ्य हे विपनासं ज्वी मालधका श्रीकरुणामययागु नामकया थ्व खँ स्त्रीयात हे मकंसे गुप्तयाना फकीर वै धागु जक आशा याना च्वन ।

थनंलि ४ प्यन्हु दुखुन्हु साहुया कला मद्रुगु बखते श्रीकरुणामय फकीरया भेषकया विभूति ह्यस बुया जटा धारणा याना कमण्डलु जोना साहु महाजनया चुके दुने वया भिक्षा फोने धका हाल चोन ।

साहुजुं फकीरं भिक्षा फोने धाःगु शब्द ताया काचा काचां क्वाहाँ वना नमस्कार याना आदरभावं तले थत बोना यंका, कोमलगु आश्रमस तया. भिक्षा बिया, नाना प्रकारया मिष्टान्न धौ दुरु पञ्चामृतादि सहित छेँ दुःगु तया इच्छापूर्ण जुयेक भोजन याकल । थ्व बेलस माहा-सिद्धा (फकीर) सन्तोष जुया साहुयात धाल ।

भो साहुजु ! धन्य—धन्य छ, छ खना जि संतुष्ट जुल । छं जिके छु फोनेत्यना फौं छं धाःगु जि बरदान बी । थथे फकीरं धाःगु न्यना साहुजुं बिन्तियाना धाल ।

भो सिद्धा महात्मा फकीरजु ! छलपोलया कृपां जिके धन सम्पत्ति सकतां यक्को दु, केवल सन्तान छता मदु, उकिं महा दुःख जुया चोन, छलपोलं कृपातया सन्तान (पुत्र) छह्य बरदान बियाबिज याहुँ धका फोन ।

थ्व बेलस फकीरजुं साहुयागु नाडी सोया लाहा बिचार याना धाल । हे सार्थबाह ! जित बाता निगः गोबर छगवाडा हकी, छंत सन्तान दैगु उपाय याना बर-दान बिया बने । साहुं बातानिगः गोबर छगवाडा हया बिल ।

फकीरं छग बातास (गोमय) साखि दंकतया छग बातां तोपुया साहुयात बिया थ्व बाता २१ नीछन्हु तक उला सोये मज्यू थ नं मज्यू स्वैतं कने नं मज्यू, क्यने नं मज्यू, छगू गुप्तगु थासेतया बिचा यानाति । २१ नीछन्हु देखुन्हु जि हे वया थ्व बाता उला छन्त सन्तान (पुत्र) छह्य बीगु जुल, छंस्त्री याके सन्तान दैगु चिन्ह मदया थ्व जत्त यानागु धका थुलि धया लिहाँ वन । साहुजुं फकीरं बियाथकुगु बाता धुकुति यंका दुने तया तालंदया थ्व खँ स्त्रीयात हे मकंसे ताचानं मबिसे गुप्त याना तल ।

थनंलि भेषधारी फकीर महाजनया छें पिहाँ वना बनान्तरे थ्यस्यंलि थ्व खँ नारायणं सीका ह्तासं वना नाप लाना नमस्कार याना बिन्तियात । भो गुरु ! थौं छलपोल भेषधारी जुया गन बिज्याना ? भेषधारी श्रीकरुणामयनं आज्ञा दयका बिज्यात । भो नारायण ! थौं जि गौड देशे च्वंह्य साहु महाधनया सन्तान मदया अष्टमी ब्रतयाना धर्मकर्म दान पुण्य याना च्वंगुलि वइत सन्तान बरदान बीगुया लागी फकीरया भेष कया वयाछें वना गोबर छग्वडा बाता निगलं थपु कोपु याना २१ नीछन्हु तक उले मते, नीछन्हु देखुनु जि हे वया उला क्यने धका सन्तान बरदान बिया वया । पुनर्वार नारायणं बिन्तियात । भो गुरु ! व बाताया दुने च्वंगु गोबरस जि जन्म



काः वने, छलपोल बिज्याना माःगु याना बिज्याहुँ । थुलि  
धया साहुयाछेँ गोबरस थःगु अंश लीन जुया चोंवन ।  
भेषधारी श्रीकरुणामय अन्तर्ध्यान जुया बिज्यात ।

थनंलि २१ नीछ्महुदुखुन्हु थ्व साहु महाधनया कला  
न्हापां दना छेँ छ्वां बँपू वंगु बखते छगू कोथास तालं दया  
तःगु खना थ्व कोथास तालंदया जित ताचा मबिसे छुं छँ  
नं मकंसे, दुने छु जक सोथना तल ज्वी मेगु थ्व छेँ दक्क  
कोथयागु ताचा जित लः ल्लाना धनसम्पत्ति दक्क पत्या  
याना तल, थन कोथा छगू यागु जक छाया पत्यार मयागु  
ज्वी । अवश्य नं छगू तःधंगु सोथना तःगु दै । बिना तःधंगु  
मदेकं थथे पत्यार मयासे तैमखु । थौं थन मसोसे  
छाया तोते धका मन हथाया चाया थ्व महाजननीन  
खापा थया हे कोथाया द्वहाँ वना सोत । छ्यंसेचो छुं  
नं मखं, सकभनं ल्लातीं माला सोत बाताया थिल,  
बाँलाक सोत बाता निगःथपु क्वपु याना तःगु दु । अले  
थःगु मन धुकु-धुकु मिका धाल । अहो ! हे दैव, थ्व  
बाताया दुने गुजोगु रत्न सोथना तल ज्वी, दक्क धनया  
हर्ता-कर्ता जित दु, थ्व छगूधा जक छाया मदुगु ज्वी ।  
थुकी दुने छु जक ज्वी, सो हे साये धका ग्याग्यां ल्ला थर  
थर खाका मन कुचुका बाता उला सोत ।

साखि छगवाडा तया तःगु खना खने वं मन बिस्मात्  
 याना धाल । श्व मिजं वेँ जकं मजुला. थपाय्चो नवगु  
 साखि छगवाडा बातास तया तोपुया ख्यूंसे चोंगु कोथाय्  
 तया नं तालं गोया ताचा थमं घाना जुल । थुजोगु खि  
 सोथना तैह्य मिजंयात वेँ धका गथे मधाय्गु हा हा श्व  
 खि थन गोप्य याना सोथना तःगु गुलि दत ज्वी, च्वने हे  
 मजीक दुर्गन्धं नवे धुंकल । धिकार—धिकार श्व मिजंया  
 बुद्धि सकसियां हेरा मोति लूँ सोथना तई श्व मिजंया  
 धुकुति खि सोथना ताचा जोनाजुल । साखि धैगुजा बँ  
 थिलेत जक ज्यू, मेगुजा छुं यायेत नं मज्यू अथवा सौपा  
 दय्केत सम्म खयले दु, सो सो धुकुती थ्यंक सोथना नवेका  
 तल धका तमं तमं पुतु—पुतु हाला बाता ज्वना पिहाँ वया  
 ऊयालं पिने हाकु तिना गोबर वाँछोया बिल ।

थुगु बेलास साहु महाधन पिनेँ द्रहाँ वल, चुके  
 सौखि छगवाडा वाँछोया तःगु खन, मने सन्देह जुया काचा  
 काचां थाहाँ वना कोथाय् सोवन, ताचा थके, खापा थया  
 चाय्का तल, द्रहाँ वना स्वत, बाता मदया आःजक धुनक  
 धिक्कार जिगु कर्म धया थः स्त्री याके न्यन । हे स्त्री!  
 थन कोथाय् सु द्रहाँ वन, थनचोंगु बस्तू सुनां काल, गन  
 छोया? स्त्री नं जवाफ बिल । भो स्वामि! छि वेँ जुलथेँ

चों, साखि धंगु बाताय् तथा कोथाय् दुनेथ्यंक सोथना तय्  
मतय् छि मम्यूला, वनं तालं दया ताःचा घाना जुल,  
जिजा तच्चोकं तँ प्याहाँवल, जिलिसे हाला दीमते,  
कोथाय् पिने वने हे मजीक नवःगुलिं दुने छु नवगु धका  
खापाहे थया द्वाहाँ वना सो वना, गोवर नवया चोंगु  
खना बातानाप पित हया ऊचालंपिने गोबर वाँछोयेधुन ।  
छि छु मचा धायला, वेँ धायला, जितः हायकेत जक  
थथे यानागुला ? नवःगु खि वाँछोत धका नं आःजक  
धुनका धका छाया धायेमागु ? ऊी थाय् थुलिमछि सा  
लहिना तैगु दु, साखिनापं गुलिजक माः, गुलित तःधंगु  
वस्तु ज्वी ।

थ्व खँ न्यना महाजनया नुगः मछिका, मिखां  
खोबि वयेका धाल, धिक्कार—धिक्कार छ पापि  
चण्डाल कुबुद्धि मिसा, कोथाय् दुने थ्यंक सोथना तःगु  
वस्तु वाँछेत जिके छकनं न्यने म्वाला जिं छुयायत  
सोथना तल ज्वी ? दुष्ट अलक्षणी कुबुद्धिहा मिसा ।

मिसा नयोगु छेँ, मचा नायोगु छेँ, नायो मडुगु  
छेँ, भों नापं नायोगु छेँ, गबलें ताले लाइमखु धका  
नीतिस धंतःगु धाथ्येँ हे खः ।

उखुन्हु तिनि फकीर छह्य वया सन्तानया निति गोबर छग्वाडा बिया नीछन्हु तक थव गोबर गोप्य याना ति, नीछन्हु देखुनु जि हे वया छन्त सन्तान बरदान बीधका धयावंगु थनि २१ नीछन्हु दत, भतीचांछि कार्य बिफल जुल । थौंया दिनस फकीरजु वया सो वइ जि छु धायगु खः । सोयित नं वयने मज्यू, कने मज्यू धका धया वंगुलि गोप्य याना तया, सो सो थव पापी अलक्षणीह्य मिसां याःगु धका फको तँ नुना छख्ये सुंक चोना चोन ।

थुगु समये फकीरजु महाजनया छेँ सरासर थहाँ बिज्यागु महाजनं खना ऊसुका तया मिखाँ खोबि वयेका फकीरया न्ह्योने वना बित्ति याना चोन ।

थव बेलस फकीरं महाजनयात धाल । हे साहुजु ! जिं बिया थकागु गोबर थनि २१ नीछन्हु दत, थौं व गोबर उला छन्त पुत्र बनदान बिया थके धका वया याकनं कया हति बिलम्ब यायमते, थौं छंगु मनोरथ पुर्ण ज्वीगु दिन खः । थथे फकीरं धाःगु बचन न्यना महाजनं छुं धाय मफया खछि सुंक चोना मिखाँ खोबि वयेका ह्यछह्य थररं खाका ह्लानिपां जोरे याना बित्ति यात ।

भो सिद्धा फकीरजु ! छलपोलं जित बिया थकुगु गोबर थव अज्ञानि कुबुद्धि जुया चव्ह्य जिह्य स्त्रीनं फुके

धुं कल, आः जिं छुयाये, धिकार जिगु कर्म। भो योगेश्वर !  
जितः क्षमायाना बिज्याहुँ । थथे साहुं धागु खँ न्यना  
हानं फकीरजुं धाल । भो साहुजु ! आम गोबर ला फुके  
ज्यूगु मखु, आपालं तःधंगु जुया चोगु, तयंह्य ईश्वर प्रवेश  
जुया चोंगु, व गोबर गन वांछत ? जितः क्यना ब्यु धका  
फकीरजुं धास्यंलि महाजनं थः स्त्रीयात सःता धाल ।  
अरे दुष्ट चण्डाल पापी अलक्षणी कुबुद्धिह्य मिसा ! छं  
गोबर गन वांछोया ? क्यना ब्यू । थथे थः स्वामि धाःगु  
वचन न्यना साहुनी नं फकीरजुयात बिन्ति याना धाल ।

भो योगेश्वर फकीरजु ! छुयाय जि अज्ञानिह्य  
मिसां अहकारं गोबर वांछोया बिया, क्षमायाना बिज्याहुँ  
धका साःगाले गोबर वांछोयागु थासे क्यना बिल । फकीर  
व महाजन काचा—काचां क्वहाँ वना सोत गोबर खन ।  
फकीर गोबर ग्वाडा कया पोला सोत, ३२ स्वीनिता  
लक्षणं पूर्णह्य दिव्य सुन्दरह्य बालक जन्म जुया चोन ।  
अले साहुयात क्यना फकीरं धाल ।

भो साहुजु ! छंगु कर्मस पुत्र लाभ मदु, जिला  
छंत पुत्र बरदान बी धका साखिस थथे बालक जन्म  
यानागु खः हानं साहुनीयात धाल ! हे साहुनी ! छंगु  
गर्भं पुत्र जन्म ज्वीगु लक्षण मदुगुलिं थथे याना बरदान

बियागु खः । तरछुयाये, छंके अहंकार पिहाँ वया थौं दिन  
पुरे ज्वीखुनु साःगाले वांछोत, श्व फुकं छिमिगु कर्मया  
फलं जूगु खः । कर्महे मदुपिन्त बरदान बियां नं दै मखु ।  
आःश्व वांछोये धुं कुम्ह मचा छिमित दैमखु जि हे यंके  
जुल धका घया व बालक भतीचा जक क्यना फकीरजुं  
बुया महाजनया छें पिहाँ वन ।

श्व बेलस साहु व साहुनी निहास्यां सुन्दर बालक  
फकीरजुं बुया थःगु छें पित यंकुगु सोया अत्यन्त नुग  
मछिका सःहे सुक्क खोया, आःछुयाये न्ह्याको खोया  
च्वंसां उपाय मन्त, धिकार—धिकार ङीगु कर्मया दोषं  
हे थये जूगु खः धका निहा तिपूनं शोकयागु गाले कुतुं  
बंका ईश्वरयागु नां कया मने धीर याना नये तोने याना  
मलीन खा ज्वीका चोन जुल ।

थुलि साहु महाजनयागु खँ जुल ।

**थनंलि गोबरं जन्म जूम्ह बालकयात  
नामाकरण याःगु खँ ।**

भेषधारि फकीरं श्व बालक यंका जात कर्म (मचाबू  
व्यंके), नामाकरण (नां छुये) याना, श्व बालक गोबरं

जन्म जूह्य निंति गोरखनाथ धका नाँ तया तः धिक  
जुस्येलि अनेक बिद्या शास्त्र ज्ञानगुण स्यनेकने याना  
शिक्षा दिक्षा बिया, यन्त्र मन्त्र योगाभ्यासं पारंगत याना,  
हानं चोनेगु थाय् देश छगू दयका अन तया अभिषेक बिया  
गोरखनाथ कानफत्ता योगी धका नाँ प्रख्यात यानालि  
भेषधारि फकीरं श्रीकरुणामय अन्तर्ध्वनि जुया बिज्यात ।

तत ऽसौ गोरखनाथो लोकेश्वराय वन्दनं ।  
कृत्वा विहरति स्मृत्वा प्रहरं च दिनेत्रयं ।

थनंलि गोरखनाथ कानफत्ता योगी श्रीकरुणामय  
लोकेश्वर गुख्यात नित्य लुमंका सुथे, ह्निने, बःह्नि, ह्नि  
सोक बन्दना याना चोन ।

थुलि गोरखनाथ धका नामारण याःगु खँ जुल ।

थनंलि गोरखनाथ नेपाले वःगु खँ

छन्हुया दिने गोरखनाथं ह्लापा नारायणयागु  
अवतारे गुणकामदेव राजायात वाया दुने जाकि दयेकेत  
श्रीकरुणामय नेपाल देशे बिज्याकेगु जि'न कोशीसयाय्

धका धैगु खँ लुमंका थुह्य राजाया पुत्र नरेन्द्रदेव राजायागु  
चरित्र सोये धका बिचाः याना नेपाल देशे वल । व  
व नेपाल देशया दथ्वी थ्यसैलि बजारे उखेंथुखें सोया  
जूगु बखते छगू थासे मिसा छह्यसँ पसः तथा मद्यपान  
(अय्ला थ्वं) मिया तोंका चोंगु खनाः उगु पसले द्दुहाँ  
वना खछि सुँकचोना सोया लिपा थमनं मद्यपान तोनेगु  
इच्छा जुया वस्यैलि पसल्या मिसायाके गोरखनाथं  
मद्यपान तोने धका फोन ।

हे केहेँ मयजु ! जि नं मद्यपान तोनेगु इच्छा जुल  
धेबा धाःसा मदु छुयाय, छं दया दुसा जितः नं तोनेगु  
व्यू । सुलि पसल्ला मिसां धाल । हे परदेशी योगीजु !  
छिगु इच्छा दुथे भपा दिसँ जि तोंके । थथे सुलि पसल्या  
मिसां धाःगु न्यना हानं कनफत्ता योगीं धाल । हे मयजु !  
जि धाःसा कानफत्ता योगी, आपाः नयेमा, आपाः  
तोनेमा, जितः सन्तोष ज्वीक छं तोंके फुला ? सुलि  
पसल्या मिसां धाल । हे योगी कानफत्ताजु ! छि गुलि  
तोनेफु उलि सन्तोष मजूतले जितोंके, छि छुं धन्दा कया  
दिम्वा । थौं चछि थन हे बास याना दिसँ धका थुह्य  
गोरखनाथ कानफत्ता योगीयात छगु कोथास बास  
बियालि व सुलि पसल्या मिसाया मती भालपु । अहो



आश्रय ! थौं जिं थ्व योगीयात मद्यपान सन्तोष मजूतले  
तोंके धका धायेधुन । थ्व सु खः गुम्ह खः देबताला भूत  
प्रेतला, जिं थ्वयात आत्मा सन्तोष ज्वीक तोंके फैला  
मफैला, आःजिं गथे याय धका धन्दा कया रात्रीस थः  
थान श्रीगणेशया थास वना श्रीगणेश आराधना याना  
एकचित्तं पूजा याना ध्यान याना चोन ।

थ्वबेलस श्रीगणेश प्रसन्न जुया आज्ञा दयकल ।  
हे भक्ति मद्यपान मय्जु ! छं जितः आपालं भक्ति याना  
तःगु दु । छंगु भाव—भक्ति खना जिं खुसि जुया चोना, छं  
जितःछु मने तथा पूजाया वयाधा । जिं पुरे याना बी ।  
थथे श्रीगणेशं आज्ञा जूगु न्यना सुलिनी मयजुं धाल । भो  
गुरु गणपति श्रीगणेश ! जिं छलपोलयात पूजा याःवयागु  
मेता कारणस मखु, थौं जिगु छेँ भयङ्कर मूर्ति ग्यानपुसे  
चोँह्य कानफत्ता योगी छह्य बास यावल, वं जित थ्वँ,  
अयला सन्तोष ज्वीक तोंके फुला धका न्यन, जिं काचाक  
तोना दिसँ, छित सन्तोष मजूतले तोंके धका धया । उकिं  
आ जिगु मती तोंके मफैला छुवे धका संखा जुया  
छलपोल यात पूजा याना बिन्ति था वया । भो गुरु  
श्रीगणेश ! थ्व योगीयात सन्तोष ज्वीक तोंके फयेक  
वर प्रसाद बिया बिज्याहुँ ।

श्व बेलस श्रीगणेशया मती श्व योगी मुज्जो, श्वयागु  
 चरित्र सोये धका थःगु रूप तोता मनुष्यया रूपकया  
 सुलिनी मिसाया पसले वना स्वस्यंलि नारायणया अंश  
 गोरखनाथ कानफत्ता योगी श्व सुलिनीयागु चरित्र सो  
 वम्ह धका सीका लिहाँ वया, नवनाग साधना याना,  
 सुलिनी मिसाया श्वँ, अयला घःघः पत्ति स्थापना याना,  
 मद्यपान समानगु लःघःघः पत्ति बिलि बिली जायक  
 उत्पत्ति याना सुलिनी मिसायात धाल । हे सुलिनी  
 मयजु ! छंछुंधन्दा काय्म्वा हँ छंथाय् वैबोम्ह योगीयात  
 वं तोने धातले तोंकि छुँशंखा काय् मते तर छं घः ल्होने  
 मते, चीके मते, थिना थिना जक का छंगु मद्य घले  
 बुंगाले लः बुया वःथ्ये बुया वै, पाःज्जो मखु, जिःमागु  
 जुगतियाय धुन लिहाँ हँ धका धाल ।

श्व बेलस सुलि पसल्या मिसां श्रीगणेश आज्ञा जूगु  
 वचन न्यना तथाऽस्तु धका बिलि याना थःगु पसले लिहाँ  
 वया अयला श्वँ तथा तःगु घले सोस्यंलि घःघः पत्ति  
 अयला श्वँ भय् भय् बीक जाया चोंगु खना धन्य-धन्य  
 श्रीगणेश धका खुसि जुया चोन ।

थनंलि गोरखनाथ कानफत्ता योगी चछि बास याना  
 कन्हे सुथे जुस्येलि पसले वना धाल । हे सुलिनि मय्जु !

जि ला बयेधुन, छं जित अयला थ्वँ संतोष ज्वीक तोंकी  
बिस्तारयाय् मते, जि थ्वँ अय्ला जक तोनेगु इच्छा जुया  
चोन, हानं भति भति जक तोना नं मगाः ।

थथे योगीं धाःगु न्यना, सुलिनी मिसां छिगु इच्छा  
पूर्ण मज्जतले भपादिसँ धया दुनेयंका छगू आसने फेतुका,  
तःगोगु बातास थ्वँ जायक तया भपि धका न्ह्योने  
तया बिल ।

थ्व बेलस कानफत्ताजुं थ्वँ मतोसे खछि सुंक चोना  
चोस्यंलि सुलि पसत्या मिसां हानं धाल । भो योगीजु !  
छाय् सुंक चोना दिया सुथंनिसँ थ्वँ तोनेव प्वाःस्याई  
धका ला ? ख जा खः, न्हापां अयलानिं भपि, लिपा  
थ्वँ भपि धका धया अयला नं तःगोगु बाताचाय्  
बिलि-बिलि जायक तया भपि-भपि धका धया चोन ।

थनंलि कानफत्ताजुया मतीं थ्व मिसां अयला थ्वँ  
बी हे मफयेक तोनां तिनि तोते धका निपा ह्लाति  
बाता ज्वना मिखा तिसिना सासःहे मल्लासे घुतु-घुतुं  
तोन । थुगु तालं लिसा काकां तोनां चोन । थथे हे  
न्हिछि तक तोना नं व सुलिनी मिसां भपि-भपि धाधां  
अयला थ्वँ हया चोंगु खना आपालं हे तोने धुस्यंलि

थःथे थमं मछाला धाल । हे सुलिनि मयजु ! गात—  
गात गुलि तोने, छ धन्य धन्य खः, जि तसकं संतोष  
ज्वी धुन । थथे कानफत्ताजुं धाःगु न्यना सुलिनी मयजुं  
हानं धाल । हे योगीजु ! आः भतीचा भपादिसँ । थौं  
कायां हानं गबले काई ।

कानफत्ताजुं धाल । हे केहेँ मयजु ! गात—गात जि  
दने बले धेधे च्वी थें चोन धया दना पला छिना सोत  
धात्थें हे धेधे चुल, अले न्हिला-न्हिला धाल । हे मयजु !  
अप्पो धैगु छुं हिसि महु, नां नं कानफत्ता, ज्या नं कान-  
फता ज्वीगु जुल । छ खना जि अति खुसि जुल, छन्त जि  
बरदान बी । छं थाय थ्वँ अयला त्वं वःपि फुक्क मोह  
जुया छकः वःहा हानं बराबर मवस्यं मफयमा, आपाः  
गाहा दयमा, छंगु लाय्या प्यदुगं लाभ ज्वीमाः । थुलि  
बरदान विया मफु मफु पला छिना धे धे च्वीक वना  
मती चिन्तना यात ।

अह आश्चर्य ! थौं जि गुलि जक अमल तोन ज्वी,  
न्ह्याको त्वसां थव मिसां त्वंका हे चोन, थवं छु जक जतन  
याना तल ज्वी, गुलि जक मद्यपान दयका तल ज्वी,  
थवयागु भण्डार छक सो हे सोये धका गुप्त रूपं हानं  
पसले वना धकीं नं खुया तःगु पर्दा उला द्वाहाँ वना सोत ।

श्व बेलस नवनागं घले हिना मद्य वढे याना च्वंगु  
खना मनं मनं धाल ।

अहो ! श्व निसां थथे नवनाग साधना याना  
तःगुलिं धका धाक्व-धाक्व मद्य तोंके फत धका थुलि  
बिचार याना आपालं मद्यपान याःगुलिं स्तमोगुण्या  
प्रभावं क्रोधया अग्नि पिकया, गुह्य नागराजायात नं संने



मफयेक मन्त्रं चिना, थमं जोना, सुनानं मखंक पिहाँ वया,  
मृगस्थली वना नवनागराजापि आसन याना, क्वातुक

फेतुना, कानफत्ता रूप गोरखनाथ योगीं स्थोरासनं  
तपस्या, यात ।

थनंनिसैं नेपाले जल बृष्टि मजुया सकलया हाहा-  
कारं दुःख जुल ।

थुलि गोरखनाथ कानफत्ता योगीयागु खँ जुल ।

थनलि खवप देशया नरेन्द्रदेव राजायागु खँ

नेपाले जल बृष्टि मजुसैंलि देशवासी प्राणी सकलया  
नयेगु तोनेगु छुं मदया हाहाकार जुया दुःख जुल ।

थनंलि देशवासी प्रजागणपिं सकलें मुना नरेन्द्रदेव  
राजाया थास वना बिन्ति यात ।

भो राजन् ! ऊगु नेपाल देशस जल बृष्टि मजुगुलिं  
सकल लोकया हाहाकार जुल । आःगथे याय्, छुयाय  
माल, छलपोलं विचार याना बिज्याहुँ । थथे प्रजागण-  
पिसं बिन्ति यावःगु न्यना राजायामनस धन्दा कया आज्ञा  
दयका बिज्यात ।

हे प्रजागर्णपि ! न्हापा-न्हापा जल बृष्टि मज्ज बले छु छ उपाय यात, छु याना जल बृष्टि जुल ? छु छगू मज्जीकं थथे अवश्य ज्वी मखु । जीगु देशयापि वा मेगु देशयापि सःस्यूपि गुरुपि निमन्त्रणा याना देव-देवता-पिनिगु पाठ-पूजा याका शान्ति स्वस्ति याकी, उक्थियात माःगु खर्च यंकी धका खर्च बिया छोया, देव-देवीपिनिगु पाठपूजा याका शान्ति स्वस्ति याकल । अथ्यनं जल-बृष्टि मज्जुसैलि हानं प्रजागर्णपि राजाया थास वना बिन्ति यात ।

भो राजन ! छलपोलया आज्ञा थें सःस्यूपि गुरुपि तया पाठ-पूजा शान्ति स्वस्ति याका नं छुं उपाय लग्य मज्ज वा मवःगुलिं घाँज्मा हे बुया मवल, पशुपंक्षि इत्यादि प्रजागर्णपि नये तोने मखना आपलं सिना वन । देशे तच्चोकिं हे हाहाकार मचे जुल । भो राजन ! न्हापा छलपोलया बौया पाले नं थथे हे जल बृष्टि मज्जुया हाहाकार जुस्यंलि सर्वज्ञ गुरु श्री शान्तिकर वज्राचार्ययागु शरणे वना वसपोलयागु उपदेश पूर्वक ज्या यासैलि जल बृष्टि जुया सकल लोक उद्धार जुल धका बृद्ध बृद्धीपिसं धाल । आःनं अथे हे याये मालि ला छु ? भो प्रभु ! थथे अनाबृष्टि जुया अनिकाल जुसैलि सुजक बचे ज्वी, सकलें मृत्यु जुया वनी । छलपोलं बांलाक बिचार याना

बिज्याहुँ । थथे पुनर्वार प्रजागणपिसं बिन्ति यावःगु खँ  
 न्यना राजाया मनस भालपु । हे दैव ! जि मथे याये  
 बिनां जल वृष्टि मज्जीक अन्न वस्तु दैमखु, अन्न मदयकं  
 लोर्कपिं प्रतिपाल ज्वी मखु । आः थथे चोना मजिल,  
 सर्वज्ञ गुरु श्री शान्तिकर बज्राचार्ययागु शरणे वना  
 वसपोलयाके बिन्ति याना उपदेश कन्या, शान्ति स्वस्ति  
 मयास्यं जल वृष्टि ज्वी मखुत धका मती चिन्तना याना  
 मन्त्री सहित प्रजागणपिन्त आज्ञा दयका बिज्यात ।

हे प्रजागणपि ! आः कीगु थ्व देशस जूगु दुर्भिक्ष  
 शान्त यायत ह्लापा शान्ति याया बिज्याम्ह सर्वज्ञ गुरु  
 श्रीशान्तिकर बज्राचार्य बिना मेपिसं फैमखुत । अथ्यया  
 कारणे किपिं सकलें गोपुच्छ पर्वते श्रीशान्तिकर गुरुया  
 थासे वनेगु धका सल्ला याना, राजा मन्त्री सहित सकल  
 प्रजागणपि मुना गोपुच्छ पर्वते वना, ह्लापां श्री स्वयम्भू  
 ज्योतीरूप बुद्ध दर्शन याना, स्तोत्र पाठ पुजा याना,  
 अनंलि शान्तिकर बज्राचार्यया अग्रस आदरभावं सत्कार  
 पूजासामान्य याना नमस्कार याना, राजा मन्त्री सहित  
 सकल प्रजागणपिसं छ्वाख्यरं चाःउला बिन्ति याना  
 चोन ।



श्व बेलस श्रीशान्तिकर बज्राचार्यं नरेन्द्रदेव  
राजायागु खाः सोया आज्ञा दयका बिज्यात ।

भो महाराज नरेन्द्रदेव ! थौं अकस्मात छलपोल  
थन बिज्यात, छुया कारणे बिज्याना आज्ञा दयका  
बिज्याहुँ ? थथे श्री शान्तिकर बज्राचार्य गुरुं आज्ञा  
दयका बिज्यागु न्यना राजा मन्त्री सहित सकल प्रजा  
गणपिसं बिन्ति याना धाल ।

भो सर्वज्ञ महागुरु शान्तिकर बज्राचार्य ! जिपि  
थन वयागु मेता कारणे मखु, कीगु देशस जल बृष्टि  
मज्जुगुलि दुर्भिक्ष जुया सकल लोकपिनि नयेगु तोनेगु छुं  
मदया हाहाकार जुया महादुःख कष्ट नया मृत्यु जुया  
वन । भो प्रभु ! श्व दुर्भिक्ष शान्तियाय धका अनेक  
देवतापिनिगु पाठ पुजा याका शान्ति स्वस्ति याके धुन,  
अथे नं छुं भतिचा हे सीमदु । भो करुणात्मा दैव तुल्य  
जुया बिज्याह्य सर्वज्ञ महागुरु ! छलपोलं सकल लोकयागु  
उपरे दया तथा याकनं जल बृष्टि ज्वीगु धर्म—कर्म शान्ति  
स्वस्ति यायगु उपाय आज्ञा दयका बिज्याहुँ । थथे राजा  
मन्त्री सहित सकस्यानं बिन्तियागु न्यना श्री शान्तिकर  
बज्राचार्य राजायात आज्ञा दयका बिज्यात ।

भो राजन ! छलपोलं यायगु दको पाठ-पूजा  
शान्ति स्वस्ति याके धुंकल, अथ्यनं जल बृष्टि मजूगु  
छाय् धाःसा ? उकीया कारण छगू दु । थ्व खँ जि कने  
न्यना बिज्याहुँ ।

ऊगु नेपाल देशे श्रीकरुणामयया शिष्य, नारायणया  
अंश गोबरं, जन्म जुया गोरखनाथ धका प्रसिद्ध जूम्ह,  
कानफत्ता योगी छम्ह वया, मृगस्थली वना नवनाग-  
राजापित आसन यांना तपस्या यांना चवन, उकिं जल  
बृष्टि मजुल । बिनां थ्व गोरखनाथ योगी दना मवंकं  
न्ह्याको शान्ति स्वस्ति यासां जल बृष्टि ज्वी मखु ।  
थथे गुरुया आज्ञा न्यना हानं राजां बिन्ति यात ।

भो गुरु सर्वज्ञनाथ ! थ्व योगी थनाछोयत छु उपाय  
यायमाली, बिन्तिभाव यांना जीला अथवा बलात्कारं,  
शस्त्रास्त्र क्यना ख्याना जीला, छु जत्न यासा दना वनी ?  
थथे धका राजां बिन्तियास्यंलि हानं श्रीशान्तिकर बज्रा-  
चार्यं आज्ञा दयका बिज्यात । भो राजन् ! थ्व श्रीकरु  
णामयया शिष्य गोरखनाथ योगीयात, कीसं बिन्तिभाव  
यासां बलात्कार यासां, शस्त्रास्त्र क्यना ख्यासां, हेकूसां  
बिना श्रीकरुणामय लोकनाथ नेपाल देशे मबिज्याकं  
दना वनी मखुत । अथ्येया कारण थ्व योगीयात थनेत

श्रीकरुणामयया अंश लोकनाथयात थन नेपाल देशे  
हयगु ज्या याना बिज्याहुँ । थथे गुरु श्री शान्तिकर  
बज्राचार्यं आज्ञा दयका बिज्यागु न्यना नरेन्द्रदेव राजाँ  
मिखास खोबितया बित्ति यात ।

भो गुरु ! श्व जा तःधंगु ज्या जुल । श्री लोकनाथ  
थुगु समय गन बिज्याना चोन, श्वसपोलयात थन  
नेपाले सुना हैगु, गथ्ये यायगु धका बित्तियासेलि  
श्री शान्तिकर गुरुं आज्ञा दयका बिज्यात ।

भो राजन् ! हतास चाया बिज्याय मते, श्रीलोक-  
नाथ थाँकने कामुनी धैगु क्षत्रे २४ गू कोटि यक्षगणया  
राजा शशी धैह्य यक्षराजाया स्त्री आपाल पुण्य दुह्यमाया  
धैह्य यक्षणीया ५०० म्ह काय्पिनि मध्ये दकसिवे  
वक्कालिह्य काय् जुया बाल लीला क्यना च्वन । वसपो-  
लया प्रभावं कामुनी क्षत्रे सुथे वा पिनागु ह्लिने पाके  
जुया अन्न नयेत प्रशस्त दया, व देशबासी सकल लोकया  
सुख आनन्द जुया चोन । श्व हे श्रीलोकनाथयात जतन  
याना थन नेपाल देशे बिज्याकेव श्व गोरखनाथ योगी  
दनावनी । अले तिनी जल वृष्टि जुया अन्न इत्यादि  
नयेगु तोनेगु प्रशस्त दया सकल लोकया मन आनन्द

जुइ । थथे शान्तिकर गुरया आज्ञा न्यना हानं नरेन्द्रदेव राजां बिन्तियात ।

भो शर्वज्ञ गुरु ! कामुनी क्षत्र धैगु गन, गुगु दिशाय सुनां स्यू, गथे याना वने, सुनां ब्वनां यंकी ? न्ह्यागु जत्न याना नं श्री लोकनाथ थन बिज्याके माली । थथे अनाबृष्टि ज्वीका प्रजाया दुःख जूगु सोया छुं जत्न मयासे जि राजा जुया चोनां छुयाये, जित सकसिनं महापापिह्य राजा धका मधाइला ? भो गुरु ! छलपोलं लोकनाथ थन बिज्याकेगु ज्याय् कृपा तया बिज्याहुँ । थथे नरेन्द्रदेव राजां बिन्ति याःगु न्यना श्री शान्तिकर बज्राचार्यजि बिचार याना सोये धका धया ध्यानांगार (शान्तिपुर) सद्दहाँ बिज्याना जातिस्मरण धैगु समाधि योगस चोना ध्यान याना न्हापायागु पूर्व जन्मया खँ दको लुमंका ध्यानागारं (शान्तिपुर) प्याहाँ बिज्याना राजायात आज्ञा दयेका बिज्यात ।

भो राजन् ! श्री लोकनाथयागु खँ न्यना बिज्याहुँ । न्हापा जिगु पूर्व जन्मस ह्यसपीठदोल धैगु थास (थौंकने ह्येपि दोँ धाइ) अन पीठे वना जि योगेश्वर श्री योगा-म्बर यागु सेवा याना सिद्धिया लागी बखत-बखते पुरश्चरणादि नं चोना, थुगु प्रकार न्हिथं बयासेवा याना

चोना । छन्हु जिह्वा काय् १० दँ दुह्य मचा जिगु ल्यूल्यू  
वःगु मखना जिं पीठेश्वरी मातृका देवीपिन्त एकचित्तं  
पूजा याना ऋद्धि-सिद्ध फोना चोना । श्व बेलस  
पीठेश्वरी मातृका देवीपिं प्रकट जुया धाल । हे महापुरुष !  
छंगु भाव भक्ति पूजा खना जिपिं कृतार्थ जुल । थौं छंत  
वरदान बीगु दिन, छं जिमित भोग (हिंसा) ब्यू ।  
थथे मातृका देवीपिं प्रकट जुया भोग ब्यू धाःगु न्यना, जिं  
बिन्ति याना । भो ईश्वरीपिं ! क्षमा याना बिज्याहुँ, जिं  
हिंसा कर्म मयाना । थन पसुत नं मदु, जिं सुभोग बिये ?  
क्षमा याना बिज्याहुँ । छलपोलपिके जिगु सहस्रकोटि  
बारंबार बिन्ति धका बिन्ति याना चोना ।

हानं देवीपिसं आज्ञा जुल । भो मानव ! थौं छं  
जिमित भोग मबिसैं मज्यू, आम छं लिउने चोंह्य भोग  
ब्यू । थथे धाःगु न्यना लिफ स्वयाबले थःहे काय् लिउने  
चोना चोंगु खन, छुयाय् छुयाय् जुल, खोया बिन्ति यात ।  
भो ईश्वरीपिं ! क्षमा याना बिज्याहुँ, जिं दतं फतं श्व हे  
याकःकाय् छह्य दु, जिं गथे याना भोग बीगु ।

पीठ देवतापिसं आज्ञा जुल । भो मानव ! आम  
मचा छं पुत्र मखु, साक्षात् श्री करुणामयया अवतार खः ।

कालान्तरे नेपाल देशे बिज्याना जगत उद्धार यायेत पुसा जकः तःबिज्याम्ह खः, छं साकि । काय् धका हाला चोने मते, जिमित भोग ब्यू । जिमिसं ला, हि जक भोजन यायगु, क्वेँ जक थ्व हे पीठे थुनाति । कालान्तरस थ्व हे क्वेँ यागु पुसा कया, श्रीलोकनाथयागु मूर्ति दयका नेपाल देशे रथ जात्रा जुइ तिनि । अले थ्व नेपाल देशे सदां सुभिक्ष जुया अन्न बृद्धि ज्वा, अले सकल लोकपिनि महाआनन्द सुख ज्वा ।

थ्व रथ जात्रायात सु अज्ञानि हेला याइ, उम्ह अज्ञानिया आयुर्दा छिन्न ज्वा, हानं मेगु जन्मे नं महादुःख ज्वा । थथे मातृका देवीपिसं धाःगु खँ न्यना जि बित्ति याना ।

भो मातृका देवीपि ! अथे जूसा जि छुयाय् लोक रक्षाया लागी कया बिज्याहुँ धका याकःकाय् भोग बिया ।

थ्वबेलस मातृका देवीपिसं ला हि जक भोजन यात, क्वेँ जक जि नमस्कार याना, अन हे पीठे भूमिस थुना गुप्त याना, हानं बित्ति याना । भो मातृका देवीपि ! जि पुत्र गबले दर्शनयाय् दइ ? देवीपिसं आज्ञा मजू, दुने बिज्यानाचोम्ह श्रीयोगाम्बरं आज्ञा दयका हल ।

हे मानब ! कालांतरस छं शिष्यं श्री लोकनाथ थन  
नेपाल मण्डले बिज्याकी । अले छं दर्शन याय् दई । थन  
वा धका आज्ञा जुया जित अष्टसिद्धि बर प्रसाद बिया  
बिज्यात । थुलि गुरुया आज्ञा न्यना राजाया मनस हर्षो-  
त्सुक याना मुसुमुसु ह्लिला बिन्ति यात ।

भो गुरु ! अथ्यजुस्यंलि थुगु कार्यस बिलम्ब याना  
बिज्याय मते, माक्व धन खर्च याय्गु भाला जिगु जुल ।  
श्री लोकनाथ थन बिज्याकेत छु छु याना बिज्याय माःगु  
खः व दक्वं छलपोलं तत्कारणं याना बिज्याहुँ । थथे  
राजाया वचन न्यना गुरु शान्तिकर वज्राचार्यं यँ देशे  
चवंहा थः शिष्य बन्धुदत्त वज्राचार्य सःतके छोट ।

थनंलि बन्धुदत्त वज्राचार्य वया गुरुयात नमस्कार  
याना बिन्ति यात ।

भो गुरु ! जितःछाय् सःतके है बिज्यानागु जिं छु  
याय माल ? आज्ञा दयका बिज्याहुँ । थथे थः शिष्य बन्धु-  
दत्त वज्राचार्यं बिन्ति यास्यंलि गुरु शान्तिकर वज्रा-  
चार्यं आज्ञा दयका बिज्यात ।

हे शिष्य बन्धुदत्त ! छ व राजा निम्ह कामुनी क्षत्रे  
 वना शशी धैम्ह यक्षराजाया ५०० म्ह कार्यापि मध्ये दकलें  
 चीधिकम्ह ३२ स्वीनिता लक्षणं पूर्ण जुया लोक उद्धार  
 याय्या कारणे यक्षया कुले जन्म जुया बिज्याम्ह श्री  
 करुणामयया अंश लोकनाथयात बौद्ध तन्त्रराजेश्वरया  
 सिदान्तं नाना प्रकारया ऋद्धि पिकया, शान्ति स्वस्ति  
 याना यक्षगजपित सन्तोष याना, वसपोल लोकनाथयात  
 थन ऋगु नेपाल देशे बिज्याके माल । थ्व ज्याय् छ बिना  
 मेपिसं फैमखु, उकि छंत सःतके हया।थथे गुरुं धाःगु वचन  
 न्यना बन्धुदत्तया मतीं बिचार यात । अहो दैव ! थ्व ज्या  
 ला चीधंगु मखु, तःधंगु हे जुया च्वन । ह्याः धाय्ला  
 धाःसा गुरुया वचन लंघना याय्गु जुल । न्ह्याः धाय्ला  
 धाःसा वने फै वा मफै, ध्यानं छकोनिं सोये धका गुरुया  
 ध्यानागारे द्वाहां वना जास्मरण धयागु समाधियोग  
 यास्यंलि न्हापा पूर्व जन्मयागु खँ लुमना वल । गथ्य  
 धाःसा—अहो ! जिला न्हापायागु पूर्व जन्मस कपिल धैगु  
 देशे बिश्व धैम्ह ब्राह्मण जुया, शास्त्रं पारंगत जुया बुद्धयागु  
 ज्ञाने चोना, नेपाल मण्डलस वया, श्री स्वयम्भू, श्री  
 गुह्येश्वरी दर्शन याना तोर्थ सेवा, पिठ सेवा याना श्मशान  
 पत्ति चाःहिल योग ध्यान याना अष्टसिद्धि लाना ओदि-  
 यानाचार्य धैगु नां प्रख्यात जुया लिपा कच्छपाल पर्वतस



स्थीरासनं चोना तपस्या याना बले बसुन्धरा देवी  
 बिज्याना दर्शन बिया बिज्यात । हानं क्षितिगर्भ बोधिसत्व  
 बिज्याना धाल, छं लिपाया जन्मस गुरु जुया थःगु ऋद्धि  
 प्रकास याना लोकनाथ श्री आर्यबलोकितेश्वर करुणामय  
 थुगु नेपाल देशस बिज्याके मानी, वसपोलयागु रथ  
 जात्रा दय्का सकल लोकयात वयना, देशोपद्रव विघ्न  
 दक्क मदयका सम्पूर्ण ज्या सिद्ध ज्वी व, उगु समये छ  
 श्री करुणामययागु शरीरे लीन जुया निर्वाणपद हुँ धका  
 जितः थुलि खँ आज्ञा दयका लोहँते लीन जुया बिज्यात ।  
 थौंया अद्यापि चोभाले बिक्रमेश्वर धैगु वैतराग दनी ।  
 आःजिगु भाग्यं थुगु जन्मस तःधंगु मौका बल, जि तरे  
 ज्वीगु अवस्था थ्यन धका पूर्व जन्मयागु खँ लुमंका  
 मने हर्षमान याना, ध्यानागारं दना प्याहाँ बया गुरुयात  
 बिन्ति यात ।

भो गुरु! छलपोलया आज्ञा निश्चय नं यायगु जुल,  
 नरेन्द्रदेव राजा नाप वना श्री लोकनाथ थन नेपाल देशे  
 बिज्याकेत जि वनेगु जुल । थथे धका बन्धुदत्तं बिन्तियागु  
 न्यना शान्तिकर गुरुं आज्ञा दयका बिज्यात ।

हे वत्स बन्धुदत्त! भिगु ज्याय् आमथ्ये शूरा जुयमा,  
 छंगु ऋद्धिसिद्धि प्रकाश याना हुँ, थुलि धया हानं राजा-

यात धाल । भो राजन् नरेन्द्रदेव ! आःथुगु ज्याय् बिस्तारयाय् मते, बन्धुदत्त गुरु बोना वनेगु स्वः थथे गुरुया वचन न्यना बन्धुदत्त बज्राचार्य, नरेन्द्रदेव राजां थुगु ज्याय् जिपिं वनेगु जुल धका बित्ति याना अन वनेत माःगु सकतां न्यना कना बन्धुदत्त छेँ लिहाँ वन । राजा नं मन्त्री सहित प्रजागणपिं सकल मुंका लिहाँ वया, थः स्त्री रानीयात थुगु खँ कना, हानं मन्त्री प्रजागणपित माक्व खँ ह्लाना अन्हे पन्हे याना, सुबर्णया कलशादि पूजाया अनेक सारदाम माक्व जोरे यानाली खवप देशया नरेन्द्रदेव राजा, यँ देशया बन्धुदत्त बज्राचार्य, यल देशया थःगु बुँ ज्या याना चोह्य रथंचक्र किसानि निमन्त्रण याना, कामुनी क्षेत्रे वनेत भिगु शुभ दिने बन्धुदत्त बज्राचार्य गुरु याना, नरेन्द्रदेव राजा जजमान जुया, रथंचक्र किसानि भरिया याना, थुपिं स्वह्य स्यां स्वस्ति मङ्गल-याना बेला सगंकया, श्री गुरु शान्तिकर बज्राचार्ययाके आशीर्वाद काःवन ।

थ्व बेलस गुरु शान्तिकर बज्राचार्य थुपिं सोह्यं स्वस्ति मंगल याना वःगु खना, थुमित आशीर्वाद बिया बिज्यात । हे शिष्यपिं ! छिमिगु ज्या तत्कारण सफल

ज्वीमा, बिघ्नोपद्रव दक्क नाश जुया दुष्टजन सुनानं छुं  
याय् मफय्मा, तन्त्रराजयागु सिद्धिया बलं याकनं श्री  
लोकनाथ दर्शन याना थन नेपाल देशे हया रथ जात्रा  
दयका क्यने फयमा, सकलया जय-जय ज्वीमा ।

थथे गुरुं ब्यूगु शुभा शीर्बाद फया सोह्रसिनं तथाऽस्तु,  
धका गुरुया चरणस प्रणाम यानालि श्री त्रिरत्न स्मरण  
याना, लोकनाथ नेपाले हयेत कामुनि क्षत्रे वने धका  
प्रस्थान याना वन ।

थनंलि ववं ववं छगू पर्वतया चोसंथ्यन, उगु थास  
कर्कोटक नागराजा मनुष्यया रूप कया लँया दथ्वी देना  
चोन । थ्व बेलस जुजुं महापुरुष छह्य लँपु पना देना चोंगु  
खना धाल । भो महापुरुष ! दँ दँ जिपि वनेत लँ भतीचा  
चिलाब्यु, थथे सोकः प्यकः धाल नं व देना चोंह्यस्यां  
छुं नं मधाः लँ नं चिला मब्युसँलि जुजुं तंपिकया हानं  
हक्का धाल । अरेरे मार्ग वन्धक ! छसु ? लेँ छने मत्यो  
धका मस्यूला, छं न्हेपन मताला छु ? छन्त सोकः प्यकः  
धाय् धुन छुं हे मधाः लँ नं चिला मब्यू, जिपि तःधंगु  
ज्या वनेत वयापि लँ चिला बीगु खःसा ब्यु, मब्यूसा  
बलाकतारं जिमिसं थने । थथे राजां हक्का धाःगु न्यना

व महापुरुष वाथाक दना मिखा ततः गो ज्वीक कना  
 जुजुया खा तंक स्वया तमं धाल । हे पुरुष ! छं जितः  
 ह्यस्यूला ? छं स्वया सुथें चों, बलात्कारं छु याय्फु का  
 या, छिपिं थुगु लँपुं वैगु कारण छु ? जि लँ चिला बीमखु ।  
 थथे महापुरुषया क्रोध वचन न्यना जुजुं हानं धाल । भो  
 महापुरुष ! छि सुज्वी ? जिमिसं मस्यू, जिपिं थुगु लँपुं  
 वैगु कारण छाया धाःसा थन नेपाल देशे जल बृष्टि मजुया  
 सकल लोकया महादुःख जुल, उकीं श्री लोकनाथ थन  
 नेपाल देशे बिज्याका सकल लोकयात उद्धार यायेया  
 कारणे कामुनी क्षत्रे वने धका थुगु लँपुं वया । थथे  
 जुजुं धाःगु खँ न्यना व महापुरुषं तमं—तमं हानं धाल ।  
 हे पथिकत ! थव नेपाल जिगु जग्गा थुकी, छिमिसं  
 श्री लोकनाथ हया गन बिज्याके त्यना ? जिगु जग्गाय्  
 लोकनाथ बिज्याकेत जिके न्यनेम्बाला ? थुगु लँपुं छोये  
 मखु, लिहाँ हुँ, मखुसाछिमिगु प्राण वनी । थुलि धया  
 थःगु स्वरूप कर्कोटक नागराजायागु रूप धारणा याना,  
 अति भयङ्कर तःत्या तःधिक जुया, फणाकया फुई—फुई  
 सासः पिकया, चमि च्वाला—च्वालां लुया चोन ।

थव बेलस व भयङ्कर मूर्ति नागराजायागु रूप खना  
 जुजु व भरिया निह्मां त्राहि—त्राहि जुया ग्याना ह्य थररं

खाका लिचिला छख्ये अलग चोना, श्री लोकनाथयात  
लुमंका चोन ।

थनंलि बौद्ध तन्त्रराजेश्वरया महाप्राज्ञ गुरु बन्धुदत्त  
बज्राचार्यं धाल । भो भुजङ्ग कर्कोटक नागराज !  
क्षमस्व क्षमस्व, कोप याना बिज्याय मते, जिपिं छलपो-  
लयाके न्यनेत हे थुगु लँपुं वयागु खः, छःपिं बहुरूप छपिं  
खना जिपिं त्राहि-त्राहि जुल, ह्लाचः धाःसा मनुष्यया  
रूप जुया देना बिज्यात, आःधाःसा नागराजाया रूप  
जुया तःधिक जुया बिज्यात । हानं चीधिक जुइफु धागु  
नं न्यना तयागु दु । धन्य-धन्य जिमिगु भाग्यं, छलपोलयागु  
वासस्थाने बने म्वाय्क थन हे जिमिसं दर्शनयाये दत ।  
भो कर्कोटक नागराज ! आः जिमिसं छलपोलयागु  
तःधिकगु रूप दर्शन याय् धुन चीधिकगु रूप दर्शन  
यायमधुनि, छलपोल महाबीरह्य खः, छलपोलं जिमित  
चीधिक रूप छकोनं दर्शन बिया बिज्याहुँ । थथे बन्धुदत्त  
बज्राचार्यं धागु बचन न्यना कर्कोटक नागराजां  
फकोनं चीधिक जुयाः सँगुप्रमाण जुया क्यन । उगुसमये  
बन्धुदत्त बज्राचार्यं मन्त्र सिद्धियागु बलं काचोक जोना,  
तमनांचा बत्ता छगले तया, ताडन तया कुना यन । थ्व-  
बेलस कर्कोटक नागराजा बीरजूसां छुं याय मफया,

तमना बत्ताया दुने चोना बिलापयाना धाल । धन्य धन्य  
 मनुष्ययागु बुद्धि जिं जाह्य नागयात छलेयाना कुना,  
 बिल, छलपोल थुजोह्य धका जिं सिल, जि तिर्यक जाति  
 अहंकारी जुया थुगु कष्ट नयेमाल, जि सासः कुना सीन,  
 जित सास्तियाय गात, पुसा उला बिज्याहुँ, जि छलपो-  
 लया दास जुल, पृथ्वी सत्य, आप सत्य, अग्नि सत्य, वायु  
 सत्य, आकास सत्य छपिसं धाःथे जि चोने । थथे नाग-  
 राजां सत्य वाचायाना धाःगु न्यना बन्धुदत्त बज्राचार्यया  
 करुणा वना, ताडन लिकया पुसाउला, भूमिस तया  
 बिल । नागराजा बत्तां पिहाँवया थीकगु रूप जुया बिन्ति-  
 यात । भो गुरु ! धन्य-धन्य छलपोल, छलपोल खना  
 जिगु मने त्रासजुल, श्रीलोकनाथ काःवनेगु ज्यास जिन  
 मद्दत बी, जितनं बोनां यंका बिज्याहुँ । थथे नागराजा-  
 यागु वचन न्यना बन्धुदत्त बज्राचार्य खुसिजुया, सुवर्णया  
 कलशे तःदहन तीर्थयागु लखं पूर्णयाना, नागराजा यातनं  
 तया द्योने स्वानं तोपुया, रथंचक्र भरिया यात धाल ।  
 हे रथंचक्र ! छं श्व कलश गोत्वीके मते, बाँलाक बिचाः  
 याना कोबियानु धका थुलि धया नागराजा सहित थुपि  
 अनं प्रस्थानयाना वन ।

थर्नालि लेँववं जुजु व भरिया निह्यस्यां मती अहो !  
 श्व गुरु जा सामान्य मनुष्य मखु खनी धन्य-धन्य

गुजोगु पुरुषार्थ, गुजोगु तन्त्र—मन्त्र यागु ऋद्धि—सिद्धि  
दुहा धका मने खँ ह्लाना ववं सिला नदी थ्यन । थ्वबेलस  
जुजुं थ्व नदि यागु स्वभाव सीका गुरुयाके बिन्ति यात ।

भो गुरु ! ऊँपि थन वैगु ज्या ब्यर्थ जुल छायाधाःसा  
थ्व नदी पारयाना वनेत तापु मद्दु, लखं वने मज्यू, आः  
गथेयाय् ! थथे जुजुं बिन्ति यासेलि गुरु बन्धुदत्त बज्रा-  
चार्यं कलशेचोँह्य नागराजा पिकया आज्ञा दयका  
विज्यात ।

भो नागेन्द्र ! जुजुं धागु खँ सिल मखुला, ऊँपि  
थ्व सिला नदीं गथेयाना पार वने ? थनयागु ज्या छपिःसं  
याय् माःगु जुल, थथे गुरुया आज्ञा न्यना कर्कोटक  
नागराजाँ गुरु व गुरुयागु ख्वाः सोथा, थुगु नदी जि  
तरेयाना बी छःपिसं छुं धन्दा कैबिज्याय् म्वाःधका  
थुलि धयालि अति तःधिक जुया, वारी ह्लिप्यनं चुया  
फणाकया तिन्हुया पारी शिरं चुया, थःगु ह्य लखं मथीक  
ताछाया, तःधंगु तापुथे चोंक यिता थितास चुया धाल ।

भो गुरु ! छःपि राजा, रथंचक्र सहितं जिगु ह्यस  
न्हुया थुगु नदी पार तरेयाना बिज्याहुँ । थथे नागराजाँ

धासैलि गुरु, राजा, भरिया सोह्यं नागराजायागु ह्ये  
न्हुया थुगु सिलानदीं पार वन ।



थनंलि नागराजाँ थःगु ह्लिप्यं पारी प्वीका काःबले  
न्हिप्यंया चोका छकू नदी दुना लोहँ जुया तोधुला कुतुंवन,  
अनं निसें व नागराजाया न्हिप्यं थुथा जूल । अले व  
नागराजां थगु ह्लिप्यं थुथा जूगु खना आवंली नागराजा  
धाक्वया जियें न्हिप्यं थुथा ज्वीमा धका-थथे प्रतिज्ञा  
यात । उकीं नागराजा धाक्वया न्हिप्यं थुथा जुल ।



थनंलि प्यम्हं सिला नदीं, पार तरे जुया, थनं नं  
प्रस्थान याना ववं कथनं कामुनि धैगु देशया समिपस  
( कामरूपी धैगु पीठस ) थ्यसैली प्यम्हं छगू थासे बिश्राम  
याना, आः ङीपिं थन राक्षसया देशे थ्यन, आः थ्व देशे  
द्वहाँ वनेत छु जत्तन याना वने, थ्व देशवासी राक्षसगण-  
पित छु याना बोधयाय् धका जुजूं सल्ला साहुती यात ।

थ्व बेलसगुरु बन्धुदत्त बज्राचार्यं जुजुयागु सल्ला  
साहुती वचन न्यना आज्ञा दयेका बिज्यात । हेराजन् !  
छलपोलं छुं धन्दा कया बिज्याय मते जि जत्तन याना  
राक्षसगणपित नयेगु तोनेगु लोभ ब्यने, अले ङीगु वशे  
वै । प्राणी धयापिं सकलें नयेगु तोनेगुली भुले जुया चोन ।  
उकिं पसुगणपिं शृष्टि याना थ्व राक्षसगणपित मकेगु  
तोंकेगु जोना वने धका धया म्वाः छगः कया मिखा  
तिसिना मन्त्र बोना ह्लाः बोबोस्याना गिलि गिलि  
याना हाकु तिना भूमिस वांछोया बिल, तुरुन्त द्वःछि  
दुगु शृष्टि जुल । हानं स्याबजि छगः कया अथ्ये याना  
वांछोत, द्वःछि फैशृष्टि जुल, हानं माय् छगः कया अथ्य  
हे याना वांछोत म्ये द्वःछि शृष्टि जुल । थुगु प्रकारं  
३००० सोद्वो पसुत शृष्टि यायधुंका कर्कोटक नागराजा-  
यात आज्ञा दयेका बिज्यात ।

भो भुजगेन्द्र ! छलपोल सुक्ष्म रूपं वना राक्षस  
गण राजा शशी धैह्य यक्ष राजाया शरीरे प्रवेश जुया  
रोग उत्पति याना ङ्यु धका अन्हे यात । नागराजा  
गुरुया आज्ञाथ्ये वना, शशी यक्ष राजायागु शरीरे प्रवेश  
जुया, शूलया रोग उत्पति याना बिल । श्वबेलस शशी  
यक्षराजयात शूलया रोगं पिंडा जुया, प्वाः स्यागु सह-  
यानां सहाय मफया ग्वारा-ग्वारां तुला के के तुलुं  
सना, छुं हालेगु समर्थ मदया, ख्वा वँचुसे चोंका चःति  
सो सो वयेका, वरावर मूर्छा जुया ख्वाउँसे चोना, अथेहे  
प्राण वनीह्य तुल्य जुया चोन ।

उगु समये यक्षराजाया सेवकपिसं अनेक सःस्यूपि  
बैद्यत सःता हल, अले व बःपि बैद्यतसे श्रीपञ्चरक्षाया  
बिधानं न्हापां (देव चिकित्सा) तन्त्र-मन्त्र प्रयोगयाना,  
लः जपा कारेयात, छुं सी मदु । हानं नाग चिकित्सा  
हिती, तुंथी, खुसी बुंगाले, पुखुली, देवालये प्वी हाय्के  
बिल, अथ्यनं छुं सी मदु । आसुरी चिकित्सा धाये (दैत्य  
चिकित्सा) शरीरे मुलुं सुया हि लिकया, प्वाथे दुने घाः  
जुल, कैवल धका खि, चो परोक्षा याना वासः यात,  
ऊन् रोग वढें जुया-जुया वल । हानं (मुनि चिकित्सा)  
अनेक जडीबूटी मिले याना, काँडा चूर्ण, रसादि आदि  
वासः नका, तोंका घ्यो, चिकं वासः ब्वीका सोत, अथ्यनं

रोग छुं सी मडु । हानं ( भूत चिकित्सां ) चोकाबजि, कः, लाभा, छा, सोँला, हि, दुरु धौतया पिखालखुस, व्छासे, खुसी बौ तयकल, अथ्यनं रोग शान्त मजू । हानं ( प्रेत चिकित्सां ) सीकयागु दोषं जुल ज्वी धका खुसी बौ तया को, खिचायात नका सोत, अथ्यनं रोग छुं शान्त मजू । हानं ( राक्षस चिकित्सां ) जा थुया भ्यग्ते तया ख्ये, न्या, ला, हि, धौ, लः सहितं तया प्यंगू लँपुया दुबाते, श्मशाने बौ तयके छोट, अथ्यनं छुं भतीचाजक हे रोग शान्त मजू । हानं डांकिनीयागु दोषं पर दोषं जुल धका छेँ छ्खां धूप थना, ताडन तया, प्वाथे ऊारे यात, ऊन्-ऊन् रोग बढे जुया वल । हानं सःस्यूपि ज्योतीष क्यना नवग्रह फायका इष्ट देवतादि पूजायाना शांति स्वस्ति, पाठ-पूजा, होमक्रिया याना, कुमारी मचात पूजा याना, भोजन याका सन्तोषयात, अथ्यनं रोग भतीचाजक हे क्वमला, ऊन्-ऊन् बढेजुया वःगु खना शशी यक्षराजाया स्त्री मायाराक्षसी आदि वया जाहानपि सकल यक्षगणपिनि मने त्रासजुया आःछुयाये, थ्व रोग लायि मखुत अवश्यनं मृत्यु ज्वीगु जुल धका धन्दाकया चोन ।

थुगु बखते बन्धुदत्त गुरु, नरेन्द्रदेव राजा, रथंचक्र भरिया थपि स्वम्ह शूरा जुया दुगु, फै, म्ये ख्याना,

मग्ग्यासे यक्षराजायागु ध्वाखास थ्यंक वन । थ्वबेलस  
अन ध्वाखास पाःचोना चोपिं यक्षपिसं खना न्यन । हे  
मानवपिं ! छिपिं सु, गनं वयापिं, सुना छोया हःपिं  
थन वैगु कारण छु ? थथे ध्वाखास पाःचोना चोपिसं  
धाःगु न्यना बन्धुदत्तं धाल ।

हे यक्ष द्वारपालकपिं ! जिपिं परोपकार बैद्यत  
खः, थन शशी यक्षराजा मफु धाःगु न्यना, वसपोलयात  
दर्शनयाना थ्व पशुगणपिं दुगु, फँ म्ये भत्ता चढेयाये धका  
वया, राजायात खबर थ्यंका ब्यू । थथे परदेशी मनुष्यया  
भाषा न्यना, द्वारपालकपिसं राजा मन्त्री सकल मुना  
चोथाय् वना परदेशी मनुष्यं धाःथे सक्तां ख कन ।  
थ्व खँ न्यना, रोगीह्य यक्ष राजा हथाय्चाया धाल ।

हे द्वारपालकपिं ! आम बिदेशी बैद्यत याकन थन  
बोना हति । थ्वहे राजाया बचन न्यना द्वारपालकपिं  
लिहाँ वना बिदेशी वैद्यपित राजायाथाय् बोनायन ।

थ्वबेलस बिदेशी बैद्यत बन्धुदत्त, नरेन्द्रदेव, रथंचक्र  
थुमिसं थःपिसं जोना वयापिं म्ये १००० द्वःछि, फँ  
१००० द्वःछि, दुगु १००० द्वःछि जम्मा ३००० सोँद्वो  
पसुत चढे याना शशी यक्षराजा दर्शन यात ।



थनंलि बिदेशो बैद्यया मुख्यह्य बन्धुदत्तं बिनित्यात ।  
 भो शशी महाराजा ! छलपोलं जिमित करुणातया  
 बिज्याहुँ, छलपोलयात छु रोग जुया चोन, गथे—गथे जुल ?  
 थथे बिदेशो बैद्यं धाःगु न्यना यक्षराजां धाल ।

हे बिदेशो बैद्यराजपि ! जित छु रोग जुल, छु  
 रोग जुल, प्वाःजक स्यायिगु, अनेक.चिकित्सा याका  
 सोयधुन छुंहे सी मद्दु, अथवा जि मृत्यु हे ज्वीगु जुलला  
 मस्यू, छलपोलपिसं छक; जित यथार्थ रूपं बाँलाक

। ध्यानतया सोया बिज्याहुँ । थथे यक्षया राजां धाःगु  
न्यना बन्धुदत्तं बित्ति यात ।

भो यक्षराजा ! छलपोलयागु नाडी छकः स्वे,  
साध्या-साध्य जिं बिचाः याय् थ्व खँ न्यना यक्षराजां  
ह्ला बिल, बन्धुदत्त गुरुं नाडी सोया लुसि, मिखा, मे,  
प्वाथे सोया बिचार याना बित्तियात ।

भो शशी महाराज ! जिं छलपोलयागु रोग बिचा  
याना सोयधुन मृत्यु ज्वी मखु, साध्य हे ज्वी तिनी, आः  
जिमिसं प्यन्हुतक रोगानुसारं वासःयाना अवश्यमेव  
लायका बी । छुं धन्दा कै बिज्यायमते । थ्व खँ न्यना  
शशीराजा चित्तबुद्धे जुया वासःयाकेगु स्वीकार यात ।

थनंलि गुरु बन्धुदत्तं खुसी नागयात प्वीँ हायके  
छोया मन्त्र बोना प्वाथे फारेयाना लःजपा तोंकालि  
रथंचक्रयात जडी बूटीया काँढा दायकेबिया, नरेन्द्रदेव-  
यात वासः मिले याका, थमं बासःजोना, महाप्रत्यङ्गि-  
राया मन्त्र लुमंका, शशी यक्षराजायात वासः तोंकल ।  
थुगु प्रकारं दिनया सोकः प्यन्हुतक देव चिकित्सा व मुनि  
चिकित्सां वासः यात । थ्वबेलस प्वाथे कर्कोटक नागराजाँ  
यानातःगु शूलरोग चिला वन । न्यान्हु दर्सौल मरणान्त  
ज्बोक प्वाथे स्याःगु रोग शान्त जुल । हानं थःपिसं चढे

यानापिं दुगु, फै, म्ये थुमिगु मांसया रस नं तोंका तागत  
बिया, बल पुष्टि याना बिल । हानं यक्षराजा स्त्री आदिं  
प्रजागणपिन्तनं पसुयागु मांस नका, रस तोंका, सन्तोष  
याना खुसि यानातल ।

थनंलि बन्धुदत्त बैद्यराजं यक्षराजा याके न्यन । भो  
शशी महाराज ! आःनं प्वाः स्यानिला ? थथे बिदेशी  
बैद्यराजं धाःगु न्यना शशी राजा मुसु-मुसु न्हिला धाल ।

भो विदेशी बैद्यराज ! जि सीत्यंह्यात म्वाकाब्यूह  
छलपोल धन्य खः । जिजा सिनालि हानं म्वाना वैह्यथें  
जुल, छःपिंगु उपाय द्वारा जि बचे ज्वी धुन, आः  
छःपिनिगु मेहनत खना जि आपालं खुसि जुल, जि व  
बीमा थ्व बीमा हे मन्त, जिके दुगु, जि बोफुगु धया  
बिज्याहुँ, थनथ्यंक दुःखसिया बिज्यानागु छुया कारणे  
खः आज्ञादयका बिज्याहुँ, माःगुतक सत्य ३ नं जि बीगु  
जुल । थथे यक्षराजा खुसि जुया धाःगु खँ न्यना सोह-  
सिया सल्लायाना बिन्तियात ।

भो यक्षेश्वर, शशीराजन् ! जिमिसं मिथ्या खँ  
ल्लायमखु न्यना बिज्याहुँ । जि नेपाल मण्डलया छह  
षट्शास्त्री गुरु बन्धुदत्त वज्राचार्य धैह्य खः हानं जि

यजमान नरेन्द्रदेव धैह्य महाप्रतापि जुजु छह्य श्व खः,  
 हानं जि सेवक रथंचक्र धैह्य गुरुभक्तिह्य किसान छह्य  
 श्व खः । जिपिं सोम्हं दुःख सिया थन वैगु कारण  
 छायाःसा वर्तमान आः थुथाय् नेपाल मण्डलस जल-  
 बृष्टि मजुया सकल लोकया महादुःख जुयाचोन । उकिं  
 जलबृष्टि यायया कारणे छलपोलया ५०० न्यासःह्य  
 पुत्र मध्ये दकले क्वकालिह्य पुत्र जिमित फोने धका  
 वया । छलपोलया सत्य दु धैगु जूसा याकनं बिया  
 बिज्याहुँ, सत्य मदुसा जिमि छु लगेजू धका बिनित्यात।श्व  
 खँ न्यना यक्षराजा छक्क जुया मती विषादयाना वधाय्  
 श्वधाय् मदया खछि सुंकचोना मने खँ ह्लात । अहो  
 आश्चर्य ! गथे फचीत उगीय खनी, हाहा धिक्कार जिगु  
 बुद्धि ; जि प्राण तुल्यह्य पुत्र गथे बीगु, आःछुधाय्गु जि  
 त्रिसत्य याय्धुन धका मनं खँ ह्लाना हानं जवाफ बिल ।

हे बैद्यराज ! श्व देशे नं जि चिधीकह्य पुत्र जन्म  
 जुसैलि तिनि मङ्गलोदय जुया सुलक्षणं पूर्णजुल, बखत  
 बखते जल बृष्टिजुया अन्न बृद्धि जुल, सकल प्रजागणपि  
 प्रतिपाल उद्धार जुल । उकिं श्व छता धायमते मेगु धा,  
 केवल जि पुत्र हे माःधैगु जूसा मेपिं बी छह्यजकजा छु  
 निह्य सोह्य हे बी, हानं जिके दुगु मेमेगु छु माःधा, जि



धाःधाःगु पुरेयाना बिया छ्वे । श्व खँ न्यना बन्धुदत्त  
गुरुं धाल ।

हे यक्षराजन् ! जिमित माःम्ह श्व हे खः, मेपि  
मज्यू । धनद्रव्यादिनं छुम्वाः । सत्य वचन खः, बीगु  
जूसा जिमिसं फोने धुन, याकन बिया बिज्याहुँ, मबीगु  
जूसा मेगु फोनेत ज्या मदु । श्व खँ न्यना हानं यक्षराजां  
धाल ।

हे मानव, बैद्यराज ! श्व जिम्ह चीधिकम्ह पुत्र हे  
माः धैगु जूसा जि बीफैमखु, छायाःसा श्व क्वकालिम्ह  
जूयानिति बौया यथे मदु, मांया यथे । हानं प्रजा प्रतिपाल  
याय्त तोता बी धुन, उकिं प्रजागणपिन्त, मांम्हयांत चित्त  
बुछेयाना यंके फुसा यंकी, थुलि धया थःस्त्री मन्त्री  
प्रजागणपि सःता सकलें मुंका श्व हे खँ धाल । श्वबेलस  
यक्षराजाया प्रजागणपि सकस्यनं छगू पाखं हक्का धाल ।

अरेरे मानवपि ! छिमिसं अनेक छल कपटयाना  
जिमि चीधिकम्ह राजकुमार यंकेत वल जिमि सकलया  
प्राणनाथ जुयाचोम्ह बालक बिया व्छेमखु छिमित माःसा  
मेमेगु फोना यंकि, व हे माः धैगुजूसा जिपिनाप ल्वाना  
त्याके फुला अलेतिनि यंके दै मफुसायंके दैमखु, छिपि  
थन चोनेमते, छिमिगु प्राण वनी । सी यःसाजक थन

चोनाचों, म्वायगु इच्छादुसा याकनं लिहाँहुँ । हानं थ्व हे खँ ह्लात धाःसा जिमिसं बाकि तेमखु आःतक लाःनि बिस्युहुँ धका बिशब्द—विशब्दं हाला ख्यात । हानं मांम्ह माया यक्षणीनं भयङ्कर मूर्तियाना वा कटटटं न्ह्यया मिखा जक पति पतियाना पुतु—पुतु हाला चोन । थुजोगु तालखना गुरु, राजा भरिया सोम्हसियां निराशा जुया थनचोनां थिक ज्वी मखुत धका तीजक खँ ह्लाता अनं प्रस्थानयाना लिहाँवया, यक्षलोकयां पिने ह्लापा चोनागु पीठस सोम्हं चोना सल्लायत ।

भो गुरु ! आःगथेयाये, कार्य सफल मज्जीकं गथे लिहाँ बने ? थथे जुजुं न्यसेलि गुरुं धाल ।

हे राजन् ! कार्य सफलयानां तोते, धन्दा कायम्वाः थ्व बालकयात जगत्मोहनी यायमाल, थ्व जत्न जि थन हे चोना याये । थुलि धया मागु सामाग्री तयार याना, सुवर्णया कलशे तीर्थोदक, पञ्चामृत, पञ्चपल्लव, पञ्च-ब्रीहि, पञ्चौषधि, छत्र सहित तया किसलो देछाया सगंधौ, गोग्रास, न्हेकं सिन्हमू, सुकुना, मोहनी सिन्दूर साधन सकतां स्थापना याना, कुण्डलाजाक्षत पञ्चसूत्रकाँ तक्कंका, दशदिग्लोक पालादि माःमाःथाय् तया ताडन तया, बन्धुदत्त बज्राचार्यं योगाम्बर पूजारम्भ याना

रहस्यबिधि क्रमपूर्वक योग ध्यान समाधि क्रिया याना जगत्मोहनी सिन्दूर साधना यागु ज्या सिधयका, कर्कोटक नागराजायात थ्व मोहनी सिंह यक्षरूप बालकयागु म्हस किकाःवा धका बियाछोत । नागराजाँ मोहनी सिंह जोना, यक्षयागु भेषजुया वना, उगु समये बगीचास म्हिताचोँम्ह बालकयात गुरया मन्त्र सिद्ध ज्वीमा धका मोहनी सिंह किकाः गुप्तरूपं लिहाँ वल ।

थ्व बेलस यक्ष रूप बालकयात मोहनी ग्यला, मन भ्रमण जुया माँ बाँपिन्त धाल । भो माता, पिता ! जि नेपाल मण्डमल छको वनेगु इच्छा जुल, जि वने न्हैँ धका न्हिथं थुगु प्रकारं हाला, नयेगु तोनेगु छुं बिचाः मयासे जुल । न्हिथं थथे हाला जूगु पुत्रयागु स्वभाव खना मां बाँपि अद्भूत चाया मती अति सन्देह जुया ज्योतीष सःता क्यना सोत । ज्योतीष प्रश्न बिचाःयाना बिन्तियात ।

भो महाराज, महारानी ! थ्व कुमारयात मोहनी ख्यला मन स्यंके धुंकल, अबश्यनं नेपाल वनी जुल, थ्वैत पितृव्य मते , बांलाक बिचायाना तैबिज्याहुँ । थुलि धया ज्योतीष लिहाँवन महाराज महारानी सकल यक्षगणपिनि मनस महाधन्दाकया न्हापाया दुगंछि सकभनं मतच्याका, थ्व बालख पिहाँवनी धका थाय् थासे

पहरा चोना चोन । हानं मांम्ह माया यक्षणीनं पुत्र पिहाँ  
वनी धका कोथाया मूलगु लुखास सँ फेना छयोँ दिका  
लपना देना चोन ।

श्वबेलस गुरु बन्धुदत्तं कलशयागु किसली लिकया  
जुजुयात श्व कलशे पंक्षी घा कीया रूपजुया न्ह्याम्ह वया  
द्वहाँ वंसां किसली देछाया ब्यु धका माःगु ज्या खँ सेना  
कना, योग ध्यान याना, लोकनाथ साधना याना चोन ।  
मन्त्रसिद्धिया प्रभावं यक्षरूप बालख लोकनाथया मन



स्थीर मजुया, रात्रिया त्रिपहरे पिहाँ वनेत दना वःगु

बखते मांह्य लुखास छ्योँ दिका सँ फिजेयाना लँ पना  
पिहाँ वने मजीक देना चोंगु खन ।

थ्वबेलस लोकनाथं पिहाँ वनेत लँ मछिना माँयागु  
छपु छपु सँ तीजक चोका माँयागु शरीर हाचां मगासे  
थःगु शरीर अनंसं तोता प्राणवायु भ्रमरयागु रूप कया  
बेगं ब्वै वना बन्धुदत्त गुरुं साधना याना तःगु सुबर्णया  
बिजय कलशे द्वाहाँ बिज्यात । जुजुं खना हतासं किसली  
देछाया बिल ।

थनंलि मांह्यसिया न्ह्यलंचाया दना सोगुबखते  
न्ह्यनेसं जीव महुहा पुत्र खना हा हा पुत्र, जि प्राणतुल्यहा  
लोकनाथ ! छं माँयात तोता गन वन वना धका विशब्द  
बिशब्दं हाला खोल । थ्व खोगु शब्दं अन यक्षगणपिनि  
सकस्यां न्ह्यलं चाया दना सो वः बले, जीव महुहा  
लोकनाथया शरीर खना धन्दा कया चोन । थूगु बखतस  
यक्षया ज्योतिष पटक धैहा वया बिचाःयाना धाल । की  
कुमार जा मेगु हे रूप कया नेपाल देशे वने धका वन, तर  
देशं पिहाँ मवँनी । साधन याना कलशे तैतल, आःतक  
लाःनी, कीपि बल्लासा कया हे ज्यूनी । थथे ज्योतीषया  
बचन न्यना यक्षपिसं जीव महुगु शरीर सुनानं मथ्युसे  
अनंतुं तया, कोलाहल शब्दं हाला अकाशमार्गं बोया

माःवसेली थ्व हे साधनायाना चोंगु थाय्खंका सुवर्णया कलश लाका हट्टटं न्हिला लिहाँ वना, कलसे चोंगरूप शरीरे दुबिका लोकनाथ दना वःगु सोया मां बौ आदि सकल यक्षगणपिनि मन आनन्द याना चोन । अन साधकगणपिनि गुरु, राजा प्रमुखं मुना नुगः मछिका ऊमुका तया धाल । जत्नजा यानागु खः आकाशं वया लाका यंकल, थथे वँगु ऊसं बिचाःयाय मफुत । आः छुयाये धका हाला चोंबले हानं यक्षगणपिं आपालंवया साधकगणपित लिना हल । थुगु समये बन्धुदत्त गुरुं साधना यानातँगु ईका, पका, तायेआखे, बिभूति कया होला छोट, यक्षगणपिं वेमफया लिहाँ वन ।

थनंलि साधकगणपिं अनंवया हानं मेगु पीठे वास याना सल्लायात । भोगुरु ! ऊसं लोकनाथ बिज्याकागु सुवर्णया कलस यक्षगणपिसं लाका यंकल, ऊसं आः काः वने फैतिनिला ? थथे चोनां मजिल, ऊपि नेपाल वना (चतुरङ्ग बल) सल, किसि, रथ, सैन्यगणपिं हया, सस्त्रास्त्र जोना, थुमिनाप संग्राम मयासैं जी मखुत, गथे याय माली ? थथे जुजुं धाःगु खँ न्यना बन्धुदत्त गुरुं धाल ।

भो राजन् ! आम खँ नं ख ; जुजुया राजनीति धंगें युद्ध यायगु ज्या धैबिज्यात, तर ज्या मछि, छाया धाःसा

युद्ध यायव इमिनं, थःपिनिनं निगू थरियाँ प्राणी नास  
ज्वी । हानं धनद्रव्यादिनं आपालं पवी । केवल थन चतु-  
रङ्ग बल गथेयाना ह्येगु, सिला नदि गथेयाना तरे याये ?  
कर्कोटक नागराजाँ फैं मखु, फुसाँ आपालं तकलीफ ज्वी,  
उकि युद्ध यायगु ज्या थिक ज्वी मखु, जि थथे धाल धका  
तंचाया बिज्याय मते, नयेगु तोनेगु निसैं फैं मखु, छलपोलं  
छको बांलाक बिचार यःना बिज्याहुँ । जत्न जुक्ति धैगु  
आपालं दु, तन्त्र मन्त्र योगं जि माःगु याय् छुं धन्दा  
कायम्वा । थुलि धया श्मशाने योग यायत माःमागु  
सामाग्रि तयार याना, न्हापां पीठ पूजा याना, लिपा  
श्मशान योग यायाँ रात्रिया तृतीया प्रहरे ४ प्यम्ह भैरवपि  
आराधना याना बिज्यात । थ्व बेलस अष्टसिद्धिया प्रभावं  
४ प्यम्ह भैरवपि बिज्याना दर्शन बिल । सुसु भैरवपि  
धाःसा-हरिसिद्धि १, हयगृव २, नन्दकुन्द ३, लुप्तसंहार  
४ प्यम्ह भैरवयातं पूजा भावयाना सन्तोषयाना बिन्तियात।

भो बीरेश्वर भैरवपि ? जिमित रक्षा याना बिज्याहुँ  
नेपाल देशे वा मवया हाहाकार जूयानिति श्रीलोकनाथ  
बिज्याकेया लागि जिपि थन बया सःस्यूगु जत्न जुक्ति  
उपाययासेली यक्षराज खुसिजुया जिके दुगु छिमिसं फोंगु,  
जि बी धका सत्य बाचायात, लिपा यक्षगणपिसं छयाना

हल हानं लोकनाथ साधन यानातैगु कलश लाका यंगु  
इत्यादि अनजूगु खँ कन । भैरब प्यम्हसिनं बन्धुदत्त यात  
ऋद्धिसिद्धि बरदान बिया, थुगु ज्याय् जिमिसं नं माःगु  
तक ग्वाहालि याय्गु जुल धका भाला कया बिज्यात ।

थनंलि बन्धुदत्त गुरुं भैरबपिं प्यम्ह कर्कोटक नापं  
थःपिं प्यम्ह जम्मा च्याम्ह मुना मन्त्रसिद्धिया वस्त्रास्त्र  
धारणयाना थःहे सेनापति जुया लोकनाथ काःवने धका  
प्रस्थान याना वन । ववं कामुनि देशे थ्यंका यक्षगणया  
राजा रानी मन्त्री सहित प्रजागणपिं सकलें मुना थ्व हे खँ  
ह्लानाचोंगु थासे वना बन्धुदत्त गुरुं थुगु प्रकारं धाल ।

हे राजन् शशीमहाराज ! छःपिसं त्रिसत्यबाचा  
याना जिकेदुगु, छिमिसं फोंगु जिं बी धाःगुलिं जिमिसं  
फोना छलपोलया चीधिकह्य पुत्र जिमित बीगुलाकी  
मबीगु? गथे खः धैबिज्याहुं । थथे बन्धुदत्त गुरुं धाःगु खं  
न्यना शशी राजा त्राहि जुया धाल । अहो आश्चर्य !  
थपिंजा हानं वलतिनि थ्व भयंकर मूर्तिपिं प्यह्य सुज्जी?  
हेस्त्री, हे प्रजापिं! काकाकी कुमारयात छुयाना उपकार  
यायमाल याकन याकनया, जिगुखुसि छिमि खुसि, थुमिसं  
यंकी बांलाक बिचाः या । थथे यक्षराजां धाःगु खँ न्यना  
प्रजागणपिसं कुमारयात बिचाःयाना फको सुचुकेत सन ।



यक्षगणपिनि परस्पर खँ ह्लाना लोकनाथयात सुचु-  
केत संगु बन्धुदत्त बज्राचार्यं खना, थःसेना, भैरवपिनिगु  
ख्वाः सोया धाल ।

भो वीरेश्वरीपि ! थ्व यक्षराजाँ सत्यवाचा भंगयाना  
ऊत लोकनाथ मबिसे लितछ्वेत सन । ऊपि लोकनाथ  
मकासँ लिहाँ वने मखु, आः थुपिनाप युद्ध मयासँ जी  
मखुत । थथे बन्धुदत्त गुरुं धाःगु खँ न्यना भैरवपि प्यम्ह-  
स्यानं भयङ्कर मूर्ति रूप धारण याना वां कटटटं न्ह्या  
तिंति न्ह्या हुँकार शब्दयाना धैबिज्यात ।

हे यक्षराजन् ! छं सत्यवाचा भंगयाना कुमार  
मबिसे असत्य याय्त्यन । छं न्ह्यागु जालयाःसाँ जिमिसं  
कुमार मकासँ वने मखु, छिमि कोटि सँन्यनाप युद्ध याय-  
माःसाँ जिपि ग्याई मखु क्षण मात्रं मोचका बी, छिमिगु  
जीवया माया दुसा आम कुमार याकनं बियाछो, बीमखु  
धँगु जूसा छिमिसं सास्तिनया सीमाली, कुमारनं बीमालि,  
का आछुधया ? थथे भैरव पिसं धाःगु खँ न्यना शशीराजा  
प्रमुखं सकल यक्षगणपि त्राहि जुया, लोकनाथयात घये-  
पुना, भैरव पिनिगु ख्वाःसोया यक्षराजां बिन्तियात ।

भो ईश्वरपि ! जिगु बिन्ति छगू न्यना बिज्याहुँ । थ्व  
कामुनी देशे जि चीधिकम्ह पुत्र छम्ह जन्म जुसेनिसँ सुथे

पिनागु वा न्हिने लय् दया सकल प्रजाया महा आनन्दजुल  
नयेत छुंहे दुःख मन्त आः थ्व मचा नेपाले यंकुसैलि  
थन जिमि दुःख ज्वीगु जुल, थुकियानिति बियाव्छेत  
थाकुगु खः, जि पुत्रयानाप जिपिनं बोनायंकी, आःथर्थ हे  
बी । थथे यक्षराजां धाःगु खँ, न्यना बन्धुदत्त गुरुं धाल ।

हे यक्षराजन् ! आम छु धैगु खँ मनुष्यया देशे  
राक्षस गथे बोना यंकेगु ? राक्षस व मनुष्य नैव नसा,  
कला भात हे जूसां राक्षसं मनुष्ययात नयां तोती, उकीं  
छिपि बोना यंके मज्यू, आपालं ताःहाकगु खँ ह्लाना  
चोनाया प्रयोजन मदु, सत्यनं बी धका धाःगुःख बीगु-  
लाकी मबी । थ्व खँ न्यना यक्षराजाया नुगःमछिका  
पुत्रयात घयपुना धाल ।

ओ पुत्र लोकनाथ ! जि छन्त गथे तोता व्छे, छं मां  
बौपिन्त गथे मायां तोता वनेगु ? आःथथे मखुत, जिगु  
सत्य वाचानं भंग मज्जीक, बिदेशी पुरुषपिनिगु इच्छानं  
पुरेज्वीक, नेपाल देशे वना जलबृष्टियाना, हानं थनन्तुं  
लिहाँ वेगु सो धया मिखास खोबिवेका, दुःख मनयाना  
चोन । हानं मांम्ह माया यक्षणीनं थःपुत्र घयेपुना हिक  
हिक कया गःप ततःपु याना मिखां खोबि वेका खाखातूगु  
सोरयाना धाल ।

हे पुता जि काय ! आः जि छंगु खाः स्वेगात, हा हा जि पूता गथेयाना तोता व्छेगु, छुयाये त्वायेधाःसां भयङ्कुर मूर्ति भैरवपि वया चोन, त्वायगु, समर्थनं मन्त, हानं सत्य वाचा नं भंग याय मजिल, जिमिगु कर्मया फलं हे जूगु खः धका पुत्रया खाःस्वेगु निराशा याना य पुता छं माँ लुमंका थन हे लिहाँ वा धका हाला चोन । हानं मन्त्री सहित सकल प्रजागणपिसं नं भैरवपिनिगु भीषण मूर्ति खना त्राहि जुया, आःछुयाय् धका हाला चोन । थ्वबेलस बालक रूप लोकनाथं धाल । भो माता, पिता ! छिमिसं छुं धन्दा कायमते, आः जि नेपाल देशे वने, लिपा जि सोया माःगु याये, जितः बेला बिया छो । थथे पुत्रयागु बचन न्यना, शशी यक्षराजाँ भैरवपि प्यहा, गुरु बन्धुदत्त, राजा नरेन्द्रदेव आदि सकसिगुं खाः सोया बिन्ती यात ।

भो वीर ईश्वरपि, बिदेशी बैद्यराजपि ! छलपोल पिनिगु गुण ज्ञान पराक्रम खना प्रसन्न जुया जि पुत्र तोता बोधुन, नेपाले माःगु कार्य सिधयका हानं थन हे लित छोया है बिज्याहुँ । जि पुत्रयात लँ ह्यसीकेयात ले जवं खवं थँसि माया पुसा होला विस्तारं यंका बिज्याहुँ धका राक्षसया बुद्धि थँसिमाया पुसां नं माःछि बिया बेलाबिल ।

थ्वबेलस बन्धुदत्त गुरुं यक्षराजायात लिपा गथे माल अथे याये धका जवाफ बिया, श्री लोकनाथयात खते तथा प्यहा भैरबपिसं क्वबीका, सुवर्णया कलस व थँसिमाया पुसा नं कया बेला जुल न्हँ धका मुसुमुसु ह्लिला नेपाल देशे सोया सकलें लिहाँ बिज्यात ।

थनंलि बन्धुदत्त बज्राचार्य थँसिमाया पुसा बच्छि २ थला बच्छि मन्त्रं सिया बुका, बुया मवैगु याना,लें होला लोकनाथयात हेका हल । श्री लोकनाथ नेपाल देशे पाखे बिज्यागु समये स्वर्गया देवतापि गन्धर्व, किन्नर, विद्याधर गणपि मुना दुन्दुभि बाजा थाना, आकाशमार्गं लसोबल । हानं देवकन्या, गन्धर्वकन्या किन्नरकन्यादि अप्सरागणपि मुना आकाशमार्गं स्वां वा गायका हल, गुलि गुलिसिनं रत्न वृष्टि, जलवृष्टि, अष्टमङ्गल वृष्टि याना हल । गुलिसिनं नाना प्रकारया मङ्गल गाथा बोना, अष्ट-सुगन्ध धूप थना हल, गुलिसिनं ताये, आख्ये, स्वां होला मङ्गलोत्सव याना हल । हानं सुछत्र, बालमुकी, गन्धवाह, शंखपाल, तक्षक आदि नागराजापि वया च्यागू गुणं सहितगु जल धाराहायका लसोका बिज्यात । हानं कामुनी देशया यक्ष राक्षस गणपि नं नेपाल देशे थ्यंक लसोया तःवे धका प्रतिज्ञा याना वल । थ्व खँ बन्धुदत्तगुरुं

सीका थपिं नेपाल थ्यंक यंके मज्यू, अबश्य नं बिघन  
 याई, आः थन हे जत्न याय् माल धका बिचाः याना,  
 साधन पोले चोंगु बिभूति, ताय आख्ये, ईका पःका कया  
 मन्त्र प्रयोग याना, लें नं आकाशे नं होला बिल, दिग्वन्धन  
 जुया मन्त्रया सिद्धि लँ मखना यक्षगणपिं थुखे वेमफया  
 लिहाँ वन । मेमेपिनं बेलाकया लिहाँ वन । श्रीलोकनाथ  
 कोबिया वःपिं भैरवपिं व्र थःपिं जक थुखे वचं छतन धैगु  
 देशे थ्यंका अग्निपर्वत लङ्घना याना अनंनिसें बन्धुदत्त  
 वज्राचार्यं कचिगु थँसिमाया पुसा होला हहं क्वदुवाल  
 थ्यँसेलि पुसा दको फुत । उकीं छतन धैगु देशे उखे मन्त्रं  
 बुकागु पुसा होला वःगुलिं थँसिमा बुया मवः, थुखे कचिगु  
 पुसा होला हःगुलिं छतनं निसें क्वदुवाल तक थौंया  
 अद्यापि थँसिमाया बन आपालं दै चोन ।

क्वदुवाल धैगु तीर्थ थ्यँसेली लोकनाथ कोबिया  
 वःपिं भैरवपिनि ऊयातुया अनसन्तुं खः दिका खिचाया  
 रूप कया खछि सुंक चोन, लिपा यंकेमाल धका  
 भैरवयागु रूपतुं कया खःकोब्यूबलेऊयातुया कोबी मफु,  
 अनेक जत्नयाना सोतनं संकेजक हे मफया, सेँ सेँ फुँफुँ  
 मिंका चःति सो सो वेका चोन । थथे जूगु बन्धुदत्त  
 गुरुं खना ध्यानं बिचाःयाना सोगु बखते शशी, यक्षराजाँ

मेपि ३०० सोसह पासापि मुंका वया नष्टछाय् धैगु  
 सुनानं मखनीगु मन्त्र बोनाः ख्याः धौ सुली थें सुला चोंगु  
 खन । हानं लोकनाथ तैहःगु खतेनं ४ प्यंगु पर्वतया भार  
 दुबिका तःगु खन । उकीं भैरब थें जापिसं हे खः कोबि  
 मफुत धैगु ज्ञानं सीका, जुजु नरेन्द्रदेव यात आज्ञा दयका  
 बिज्यात ।

भो राजन् ? श्रीलोकनाथ नेपाल देशेजाथ्यन तर  
 शशी यक्षराजाँ हानं लितयंके धका ३०० ह्य पासापि  
 बोना वया थन सुला चोन, सुनानं खनीमखू जिं खन ।  
 हानं लोकनाथ तथा हैगु खतेनं प्यंगू पर्वतयागु भार  
 दुबिक ज्यातुका तल । उकिं भैरबपिसं हे कोबित थाकुल ।  
 कोपि कायल जुया तोता वनी, अले इमिसं लितयंके धैगु  
 विचार यागु खः । तर जिं माःगु जत्तयाय्, छुँहे धन्दा  
 कायम्वा, जिं धैथे जकया । आः हानं ह्यापायार्थे समाधि  
 योग ध्यान याना, कलसे श्रीलोकनाथ साधना याना काय्  
 अले कलश छगः जक जोना वनां गाई । खः इमिसं लित-  
 यंकूसा थयं । थ्व ज्या यायबले जिं नबायमज्यू, किसली  
 लिकया तय्गु, श्री लोकनाथ स्मरयागु रूपकया कलशे  
 दुहाँ बिज्याई, किसली देछायाब्यू, थथे मयायव थ्व ज्या  
 सेनी बांलाक बिचारया । थुलिमछि दुःखसिया यानागु

कार्यं घौपलखं व्यर्थं ज्वी, नुगले ध्वामिका धन्दा कया  
 बिज्याहुँ धका माको खँ ह्लाना, छगू गुफाया दुने सुनानं  
 मखनिगु थासे गुप्त रूपं चोना, च्यागू दिगसं दिगबन्धन  
 ताउन तया, रथंचक्र भरिया व कर्कोटक नागराजा थुपि  
 निह्य पिने पिवा तया, दुने थःपि निम्ह चोना, जुजुयात  
 जजमान याना, थः गुरु जुया, रहस्य बिधि योगाम्बरयागु  
 योगं लोकनाथयात कलशे दुबीकेत न च्यान्हु तक योग  
 ध्याने चोना १२५००० सवा लाख जप याये धुंका  
 सुवर्णयागु कलशे पञ्चसूत्र कां तक्थंका किसली लिक्का  
 लोकनाथयात साधना याना बिज्यात ।

थनंलि श्रीलोकनाथ भ्रमरया रूप कया भुनुनुं  
 हाला सुवर्णया बिजय कलशे सोचा चाःहुला दुने दुहाँ  
 बिज्यात । उगु समये जुजु नरेन्द्रदेवया आपालं दुःख कष्ट  
 नया न्ह्योपाः याना वःगुलिं परिश्रम जुया भुसुक्क न्ह्यो  
 वेका छना चोन । ताउत नं किसली देछाया मज्जुगुलि  
 भ्रमरया रूप लोकनाथ कलसं पिहाँ बिज्यात । गुरु बन्धु-  
 दत्त बज्राचार्यं हानं द्वितीय योग याना आकर्षण याना  
 बिज्यात, भ्रमरया रूप लोकनाथ ह्लापाया थेंहे बिज्याना  
 कलश चाःहुला दुने दुहाँ बिज्यात । जुजुया ह्लापायासिवे  
 दुगंछि अप्पो न्ह्यो वेका ताउन नं किसली देमछाया

पिहाँतुं बिज्यात । श्व बेलस गुरु बन्धुदत्त वज्राचार्य  
योगं दिना आज्ञा जुल ।

भो महाराज ! गथे न्ह्यो वःगु ? भ्रमर रूप लोक-  
नाथ निको बिज्याय धुंकल, प्रथम योग सिंति वन  
धका हानं द्वितीय योग याना, द्वितीय योग नंसिंति वन  
आः तृतीय योग छगू दनि, थुकी नं थथेहे जुल धाःसा श्व  
ज्या अवश्य स्यनिगु जुल । ह्लापा नं मखु, लिपा नं मखु  
थुगु हे औसरे न्ह्यो वेका ज्या बिफलयाय त्यन । थथे  
ज्वी धका जिं ह्लापा हे संछे याका, दछिया सेवा घौंछि  
पबीन, सोकः सिवे प्यकः बिज्याई मखु लिहाँ बिज्याई ।  
लितयंकेत तत्पर जुया वैचोँपि दु, छलपोलया धंग  
आमथे । कीसं दुःख सिया ज्या यानागु सिंति वनी,  
सकसिन धिक्कार नं याई । गथे धन्दा मदुगु ? निगू मौका  
सिंति वन, आःछगू दनि होस याना बिज्याहुँ धन्दा कया  
न्ह्यलं चायका बिज्याहुँ धका उपदेश बिया, हानं  
न्हापाया थें हे तृतीय योग समाधि ध्यान याना लोकनाथ  
साधना याना बिज्यात ।

उगु समये जुजुं भ्रमरया रूप लोकनाथ बिज्याईगु  
सोये धका फक्क बलं न्ह्यो मवेकुसे सोया च्वन, लिपा  
हानं ह्लापाया थें हे साराक न्ह्यो वल । श्व हे बेलस  
मन्त्र सिद्धिया प्रभावं हानं भ्रमर रूप लोकनाथ भुनुनुनुं



हाला वया, कलश चाःहुला दुने दुहाँ बिज्यात गुरु बन्धु-  
दत्त वज्राचार्य जुजुयागु स्वभाव खना मतीं-मतीं धाल,  
धिव्कार-धिव्कार थ्व जुजु । किन्तु यक्षराजाँ जक थथे  
यातला धका धन्दा कया, आ गथे याये जि नवाये मज्यू-  
नि, जुजुया न्ह्यो वो, किसली, सुनां देछाया बीगु, रथंचक्र  
धाःसा थन दुकाय मज्यू, वया अभिषेक नं मदुनि । आः  
ताउत नं थथे जुल धायब अवश्य ह्लापाया थें हे पिहाँ  
बिज्याई, हानं बिज्याई मखुत । आः छुयाये, थ्व ज्या  
अवश्य नं फचीत ज्वीन धका बिचा याना न्ह्यो वेका  
चोंह जुजुयात चुल्यां खात ।



जुजुया क्सक न्ह्यलंचाल, हतासं किसली कया  
 कलशे देछाया बी धुसंली जुजुया मने अहंकार वया मनं-  
 मनं थथे धाल । अहो, जिथि जाह्य जुजुयात हे थ्व गुभाजुं  
 चुल्यां ख्वात, थ्वैत जि त्वाथला बीला, पाला बीला धका  
 च्वाक्क मती तल । थथे जुजुया मती तःगु खँ गुरुं सीका  
 थौं जुजुं गुरुयात त्वाथले धका मती तल ज्यूका, आः थुगु  
 ज्या सिधल, विशेष भतीचा बाकी दनि, थ्व वाकि दुगु  
 ज्यानि सिधयके धका मती तया, पूजा धुंका क्षमापन  
 याना क्रमथे सिह्ल तिना प्रसाद कया जुजुयात नं सिंह  
 तिका प्रशाद बिया, न्हिला-न्हिला आशीर्वाद बिया,  
 पूजा विसर्जन याना, हर्सोत्सुकं सुवर्णया कलश रक्षा याना,  
 न्हापाया थें भैरवपिसं कलश कोबीका, थाय् थासे ताडन  
 तया, थुगु क्वदुवालं प्रस्थान याना, इन्द्रादि देवतापिसं  
 मङ्गलोत्सव याका, हहं बुँग देशे थ्यंका छगू शुद्धगु स्थाने  
 दिका आनन्दं विश्राम यासैलि प्यह्य भैरवपि बिदा कया  
 गुप्त जुया विज्यात ।

स्वर्गया अमरापुर निसें देवतापि वया श्री लोकनाथ  
 दर्शन याना, पाठ पूजादि याना, विश्राम याना वंगु जुया  
 निति अनंनिसें बुँग देशयात अमरापुर धका धाल ।

थनंलि नेपाले मृगस्थली नवनागासन याना तपस्या याना चोँह्र कानफत्ता रूप गोरखनाथ योगीं श्रीलोकनाथ गुरु नेपाल देशे बिज्यात धैगु सीका दर्शन याये धका हतासं दना बुँग देशे वना श्रीकरुणामयया अंश लोकनाथ गुरु दर्शन याना, १०८ अष्टांग प्रणाम पूजा पाठ स्तोत्र याना थःगु थासे लिहाँ वन । थ्व बेलस नवनागराजापि नं आनन्द आकाशे वना मेघमाला धैगु वचुगु सुपाचे च्वना श्री लोकनाथयात नमस्कार याना नेपाल देशे जल बृष्टि याना हल । थुगु बखतस तिनि नेपाल देशे जल बृष्टि जुया सकल लोकया आःतिनि सुख ज्वीथु लक्षण बल धका आपालं हर्षमान याना चोन ।

थनंलि गुरु प्रभृति सकलें मुना अमरापुर धैगु बुँग देशंनिसें कलश जात्रा याना हया ग्वाखंचा धैगु थासे थेन, अन शशी यक्षराजां पुत्र लोकनाथयात हरण याना यने धका वया सुला चोन, गुरु बन्धुदत्त खंका अनसन्तुं ताडन तया बिल, व यक्षराजा गनं वने मफुत, थौंया अद्यापि अन हे सिद्ध जुया चोन ।

हानं अनं जात्रायाना हहं इवला ख्यो धैगु थासे थेन, थुगु थासेनं माया यक्षणी वया पुत्र हरण याना यंके धका सिमाया च्वे सुला चोन, थन नं गुरु खंका ताये आखे

होला ताडन तथा बिल, व यक्षणी गनं वने मफुत, थौंया अद्यापि व हे सिमास चोना चोनतिनी । उकीं व सिमा-यात मां सिमा धका थौंतक नां जुया चोन । व सिमा च्वे चोंह्य माया यक्षणीनं थः परिवारपि सःता उपद्रवयाई धका थनं निसें स्वैतं महाय्कुसे, बाजंनं मथाकुसे सुति-सुति हल, वहे थिति थौंया अद्यापि लोकनाथ जात्रा याना हयिबले इवला ख्यो धैगु थासंनिसें पूचया प्यपु लँ तक बाजं थाय् मजिया चोन । पूचया प्यपु लँ पुसैलि सकलयां मन आनन्द याना आःसुनानं हरण याना यंकीगु भय मन्त धका हर्षमान याना लगंख्यल हया ईति धैगु प्यपुले थ्यसैलि बिश्राम यात । थन कर्कोटक नागराजाँ आः ज्या सिधल जि वने धका गुर्याके बिन्तियात; गुरुं बिज्याहुँ धका बचन विल । अनं कर्कोटक नागराजा छपु लँ तःदहने थःगु थासे लिहाँ बिज्यात ।

थनंलि गुरु बन्धुदत्त बज्राचार्य थुगु लँपु जिगु कान्तिपुर (येँ) देशे वनेगु, श्री लोकनाथ थुगु लँपु बिज्याके माःधका आज्ञा जुल ।

हानं नरेन्द्रदेव राजां थुगु लँपु जिगु भक्तपुर (खबप) देशे वनेगु, श्री लोकनाथ थुगु लँपु बिज्याके माः धाल । थथे राजां धाःगु खँन्यना हानं गुरुं धाल ।

भो राजन् ! आम खँ गबले ज्ञी, जि तन्त्र मन्त्रया  
सिद्धि, विद्याया समर्थं दुःख सिया, धन द्रव्य खर्च  
मज्जीक ऋद्धिसिद्धिया बल वीर्य क्यना हयाह्य लोकनाथ  
थुगु लँपुं कान्तिपुरस यंकेमाः आपाः ताःहाकगु खँ ह्लाय  
मते । थथे गुरुं धाःगु बचन न्यना पुनर्वार राजां धाल ।

भो गुरु ! छलपोलं आमथे धाय् मज्यू छाया धाःसा  
श्व ज्या जिगु प्रार्थनां जूगु खः । ह्लापा श्व ज्यायाय्गुलि  
कोसीस याना धन माको खर्च यानाह्य जि । छलपोलं  
आपालं ऋद्धि क्यना मन्त्रया बलं अनेक किंस्मत याना  
बिज्यागु खः । थुकी माःगु दक्षणा व सिरपा बिया गुरुयात  
सन्तोष याय माःगु जिगु कर्तव्य खः । छलपोल गुरु  
पुरोहित खः, जि जजमान खः । जजमानया उपरे करुणा  
तया ज्या सिद्ध याना बिज्यात, छलपोल धन्य खः । भो  
गुरु ! छलपोलं जि जजमानयागु देश तोता थःगु देशे  
लोकनाथ यंके धाय्गु योग्य मजू । उकीं श्व लँपुं ख्वप  
देशे हे यंके माःधका धाल । थथे गुरु व राजायाया खँ  
न्यना रथंचक्र भरियाँ बित्ति यात ।

भो गुरु, भो महाराज ! जि छगू बित्ति याये,  
अबसर माफ याना बिज्याहुं । थन प्यपु लँ दु, छपु लँ  
कर्कोटक नागराजा लिहाँ वन । छपु लँ गुरु बिज्याहुं,

छपु लँ महाराज बिज्याहुँ, सत्तीगु छपु लँ लोकनाथ  
कोबिया जि ललिपुर (यल) देशे वने । छलपोलपि  
निम्हसिया बाजियाना कच कच याय म्बाल । जि माःगु  
तक सामाग्री कोबिया महगु जूसा थ्व ज्या गनं सिद्ध-  
ज्वी । जि चिकु तानो, त्यानु, न्ह्यो वो, नये हिँ, तोने हिँ  
मधया, भरिया धैहसिया नयेगु ब तोनेगु बल खः, अथे  
जूसां जि पित्यागु प्यास चाःगु सह याना अह्लेयागु तक  
ज्या याना कष्ट नया वँगु लोकनाथं स्यू । अथेया कारणे  
थुगु सत्तीगु लँपु यँका ललितपुर (यल) देशे बिज्याके ।  
अथे रथंचक्र भरियां धागु न्यना जुजु तम्बेका धाल ।

अरे भरिया ! छं छु खँ ह्लाना, छं कोबिया कष्ट  
नया वःगु मेहनत अनुसारं ज्याला जकं काय्दै लोकनाथ  
यँके दैमखु । जि छंत ज्याला बीया सन्तोष याये माःगु  
खः । लोकनाथ बिज्याकेगु हक जिगु हे जक दै, मेपि  
सुयाँ दैमखु । उकीं थुगु लँपु भक्तपुर (ख्वप) देशे हेयँके  
माःधका तमं धाल । थुगु प्रकारं जुजु गुरुयात नं भरिया  
यात नं तम तमं धालेलि हानं गुरु बन्धुदत्तं धाल ।

हे राजन् ! तंचाया बिज्यायमते, शान्तजुया  
बिज्याहुँ । कीसं ह्लापा हे लोकनाथ थुगु देशे बिज्याके  
धैगु तहकितयाना वनेमाःगु खः मवना, आःद्वने धुंकल

स्वाल, तर गुरु आदि खुगूज्या याना जुपित नीतिस थथे  
धैतगु दु ।

सूति दूतिका चैव कृषकश्च वरांगना ।

उप ध्यायश्च वैद्यश्च कार्यान्ते च तृणोपमा ॥

दिदि अजिमा, लमि, ज्यामि, बेश्या, गुरुउपाध्याय,  
बैद्य थ्व खुगू ज्या यानाजूपित ह्यापा थःगु ज्यासिमधःतले  
बिन्ति बिन्तियाना मान्ययाना तै, लिपा थःगु ज्या सिधल  
धायव घाँय् तुल्य याना छोई । व धैतःगुथ्येतुं आः  
छलपोलं ज्या सिधलकि जित गुरु पुरोहित खः माक्व  
दक्षिणा काधका तमं तमं धाल । जिगु मेहनतयात त्वेक  
दक्षिणा बीफुला ? छलपोलया देश छगुलि ब्यूसां मगाः,  
छुजक दक्षिणा बिया जित सन्तोष याई । तर जि दक्षि-  
णाया लोभं थ्व ज्या यानाह्य मखु । जि गुरुया बचन  
शिरोपर याना लोकया सुखानन्द याय्या लागी सम्म  
थ्व ज्या यानाह्य खः । भो राजन् ! कीपि सोह्य सुयागुं  
अधिने चोना वैपि मखु, लोक उद्धार याय्या कारणे  
स्वच्छन्द मनयाना वैपि खः, थौं लोकनाथ थन नेपाल  
देशे हयेधुन, आः थथे कच-कच याना चोनाया छुं  
प्रयोजन मदु जि छगू बिन्ति याय् न्यना बिज्याहुँ ।  
भो महाराज ! कीपि स्वार्थी मखु, निस्वार्थिपि खः,

उकीं आःथन ललितापुर देशस बरदेव राजाया पर्याय  
 जुया चोन, थुह्य राजायात धया, थ्व देशया दकले  
 थकालिह्य ज्ञान बुद्धि नं दुह्य, स्थबीर (बुढा) छह्य  
 हया थ्वं धाःगु देशे श्री लोकनाथ यंका तेगु पक्का जुल ।  
 थ्व ज्याय् मन बिष्माद मयासे सत्य कबल याना  
 बिज्याहुँ, जिं याय् जुल । थथे गुरुं धागु बचन न्यना  
 जुजुं नं ज्यू ज्यू ठिक्क जू धका निह्यसिया परस्पर खँ  
 ह्लाना सत्यवाचा याना, थौं मखुत कन्हे सुथसिया प्रहरे  
 याय्गु धका निह्य सुंक चोन । थ्व खं न्यना रथंचक्र  
 भरिया गुप्त रूपं बरदेव राजाया थाय् वना राजायात  
 नमस्कार याना, थ्व खँया बृतान्त कना लिहाँ वया  
 सुंक चोना चोन ।

थनंलि बरदेव राजां जत्न यात । छु धासा-थःगु  
 देशे दकले थकालिह्य बुढा दुह्यसिगु छेँ भिगुधौ छगले  
 चि भतीचा नं तया, छह्य दूतयात नकाबा धका बिया  
 छोट । राजाया आज्ञा थें देशे दकले थकालिह्य बुढा दुगु  
 छेँ दूत वना बुढायात धौ नका लिहाँ वल । बुढां काय्,  
 छय्पित धाल । थौं जितः धौ नके हःगु छाय् ज्वी, थ्व  
 धौलि चि नं दु, जिं नय् धुन, नुनया सेवा या धायके हःगु  
 ज्वी, जिं नवाये माःगु छु ज्या वल ज्वी धका छेँ  
 जहानपि नाप हाला चोन ।



कन्हे सुथे जुल, बरदेव राजां बुढायात सःतके हल,  
बुढा वना राजायात नमस्कार याना बिन्ति यात । भो  
महाराज ! जि वेधुन आज्ञा छुदु ? बरदेव राजां धाल ।

हे बृद्ध ! छ सोको जंको याय् धुं कुह्य स्थविरखः ।  
झीगु देशे श्री लोकनाथ बिज्याकेगु विचाःयाना छं नवाय  
माल धका रथंचक्र किसानं कना वंगु खँ फुक्क बुढायात  
कना छं नुनना सेवा या, मयात धाःसा छंगु प्राण वनी  
धका ख्याना लित छोट ।

थनंलि लगंख्यले ईति धैगु थासे बिज्याना चोपिं गुरु  
व राजा निह्यसिनं वरदेव राजायात छलपोलया देशे  
दकले थकालिह्य ज्ञान बुद्धि दुह्य स्थविर छह्य बोना  
छलपोल थन बिज्याहुँ धका माःगु खँ चोया निमन्त्रणा  
यात । थुगु समय बरदेव राजां व हे धौ नकाह्य बुढायात  
सःतके छोया मेमेपिं नं मुंका लगंख्यले ईति धैगु थासे  
वना गुरु व राजायात माःगु सत्कार याना व हे बुढायात  
न्होने तया बिल । थव बेलस गुरु बन्धुदत्त 'बज्राचार्य'  
बृद्धयागु खाः सोया धाल ।

भो स्थविर नायक ! जिमिगु निसाफ छगू याना  
ब्यू, छु धाःसा-जिमिसं श्री लोकनाथ कामुनी देशं हया

थन तक बिज्याके धुन, आः थनं थःथःगु देशे यंके माः  
 धका जिपि निम्हसिया त्वापु जुया चोन, सोयागु देशे  
 यंके माली थमं धाःगु खँ जिमिसं माने यायगु जुल । येँ  
 देशे यंकेगु ला खप देशे यंकेगु ? यथार्थ रूपं धैदिसँ ।  
 भो स्थविर ! थः आपालं म्वाय दैमखुत, मृत्यु ज्वीगु  
 बखत थ्यन । उकीं सत्य थें धैदिसँ, मुलायिजा याना  
 मिथ्यां धैदीमते । थ्व खँ न्यना बुढाया मनस आश्रयं  
 जुया खछि सुंक चोना मनं मनं धाल । आः जिं छुयाय्  
 गुर्या थासं यंके माःधाःसा जजमानजुजुया तम्बै, निसा-  
 फंला जुजुया थाय् हे यंके माःगु खः । हानं वरदेब  
 राजायात रथंचक्रं धार्थे थन ललितपुरे तयेमाः धाय्  
 धाःसा थ्व जिगु धर्म मखु, मधाय धाःसा बरदेव राजां  
 जिगु प्राण काइगु जुल । आः गथे याये धका बिचाः  
 याना नमवासे सुंक चोना चोंसेली हानं नरेन्द्रदेब राजां  
 धाल ।

हे स्थविर ! ग्यायम्वाः थमं धाःगु सकार धका  
 जिमिसं सत्य बाचा याय धुन फरक ज्वी मखु । थमं  
 असत्य छता बोले याये मते, सुखना नं ग्यायम्वाः,  
 याकनं धैदिसँ धका च्वेकल । थथे नरेन्द्रदेब राजां धाःगु  
 बचन न्यना व स्थविरं ब्रिन्ति यात ।

भो गुरु, भो महाराज ! छलपोलपिसं सत्य बाचा  
याना बिज्याय धुंकल, हानं जिं सत्य कोबी धुन, सत्य  
धैगु थन हे स्वेदै । लोक सकसिनं सत्य तोते मते, सोह्र  
सिया थःथगु ऋद्धि पिकया दुःख कष्ट सहयाना, कामुनी  
क्षत्रे थ्यंक वना, लोकनाथ कया थन थ्यंक हये धुंकल,  
आः संयोगं गनं निसैं वया, जि बुढाचां नवाय माल ।  
जिगु कपाले दिका जिं जति न वाय मासैंली, सकसिनं खने  
दयक ताय दयक चोना धाये, उगः न्हेगः हया देतना ब्यू,  
उकी द्योने चोना धाय् । थ्व खँ न्यना सकलें हिला ठीक  
धाल धका न्हेगः उगः हया देतना बिल ।

थनंलि व बुढां बिचाः यात । आः जितः पाप लासां  
पुण्य लाःसां बरदेव राजां हे फइ, नुनया सेवा याय हे माः ।  
जि हानं गुलि हे म्वाई, छन्हुजा अवस्य नं सिना वनी ।  
असत्य बोले याना थर्थे सीसा नं थसी । बुढा छह्रसैं याना  
श्री लोकनाथ यल देशे लात धका लिपा हुँकन थ्यंक जिगु  
नां काई, सकसिनं प्रशंसा हे याई । श्री परमेश्वरयाके  
क्षमा फोने धका बिचाः याना, न्हेगः उगःया द्योने थहाँ  
वना च्वे चोना सकसिगुं ख्वाः सोया धाल ।

भो गुरु, राजा प्रजादि सकल लोकपि ! सकलसिनं  
सोया न्यना का जिं नवाय त्यना । गथ्य धोःसा—

इग त्याग मंगल भट्टाया खः,

ईश्वर त्रिभिभुवनया अवश्य खः ।

श्री परमेश्वर लोकनाथ थुगु

ललितपुर देशे बिज्याके माः ।

थ्व श्री जगन्नाथ प्रभु लोकेश्वर यात

स्वर्ग मर्त्य पातालवासी सकसिनं

पूज-मान्य यायमाल ।

सत्य ३ नं थथ्य याय माःगु जुल न्हां

थथे धका सोकः तक थ्वहे खँ बोले यात ।

थुगु प्रकारं असत्य बचन बोले याना ब्यूगुलि न्हेगः

उगः व बुढा सहितं अन भूमिसन्तुं सोतुना, बुढा तुरन्त

मृत्यु जुल । अथे जूगु अन स्वैचोवःपिं सकल लोकपिसं

खना आश्रय जुया थःथःगु थासे लिहाँ वन ।

थनंलि गुरु बन्धुदत्त व जुजु नरेन्द्रदेव निह्यसियां

नुगःमछिका, अहो दैव ! थ्व बुढां अन्यायं असत्य बोले

याना थन हे सिना वन, धिक्कार धका थुलि धयालि  
गुरुं जुजुयात धाल ।

हे राजन् ! कीसं न्हापा हे थुगु देये बिज्याकेगु धक  
खँ दयका वेमाःगु मवया, आः मलाकापश्चाताप कयां  
छुयाय, छुं प्रयोजन मदु । न्यना बिज्याहुँ, की निह्यसितं  
छुं भतीचा पाप लाःगु दु । कर्कोटकनाग लेँ देना चोँह्य  
यात छःपिसँ तुति थ्वाना दँ दँ धका थंगु । जि मन्त्रया  
वेगं जोना बत्तास सासःकुं क सोथना सास्तियानागु दु ।  
थुकीया पापं छलपोलयागु देशे नं मबु, जिगु देशे नं मबु,  
कुकोबिया वःह्य भरियायागु देशे लात । आः छपिं नं  
सुं क चोँ, जि नं सुं क चोने । थ्व देशया सोकः जंको  
धुं ह्य बुढां असत्य बोलेयाना न्हेग उगः सोतुना थहरि  
सित, तर याइह्य काईह्य फुकं थ्व हे लोकनाथ खः ।  
सत्य बचन धैगु बरातःधं, व बुढां थें असत्य बचन बोले  
याना कीपिं सोमज्यू । श्री लोकनाथ थ्व हे देशे तयगु  
पक्का जुल । पुत्र धैह्य मां बौया अतिनं प्रेम खः, थौं जोसं  
मांबौ आदि यज्ञगणपित खवेका लोकनाथ हया, थुकीं  
वःगु दोष, पाप वसपोलयाके हे माफि फोने । थुलि धया  
गुरु बन्धुदत्त बज्राचार्यं श्री करुणामय लोकनाथ नेपाल  
देशे बिज्याकागु सम्बत् चोया विज्यात ।

अतीत कलिवर्षषु शून्यद्वन्द्वरसाग्निषु ।

नेपाले विजय श्रीमानार्यावलोकितेश्वरः ॥

३६०० सोद्वःव खुसः दँ कलिका वर्ष थ्यंबले श्रीमत्  
आर्यावलोकितेश्वर, लोकनाथ नेपाल देशे बिज्याकागु  
जुल धका थथे प्रमाण रचना याना बिज्यात ।

थनंलि गुरुं राजायात आज्ञा दयका बिज्यात । भो  
राजन् ! आःफोसं थ्व कलश गर्भे तया श्री लोकनाथयागु  
मूर्ति दयके माल थुलि धया महागुरु शान्तिकर बज्राचार्यं  
पूर्व जन्मयागु खँ कना बिज्याःथे, ये ह्यायपी द्वँ पर्वतस  
वना अष्ठिधातु सुवर्ण माला हया, चुर्ण याना, थ्व मूर्ति  
दयकीह्य सु ? गन दै धका बिचाःयात, अन हे यल देशे  
उत्तमगु यंपी धैगु बिहारे शुद्धचित्तं धर्मयाना चोंह्य  
मुमतिसान्त (शुभश्री मिश्र) धैह्य शाक्यवंश दु धैगु सीका  
वैथाय् वना, श्री लोकनाथ करुणामययागु मूर्ति दयके  
बिल । गुरुया बचनानुसारं व शाक्यभिक्षुं अष्ठिधातु  
सुवर्ण चूर्णया ३२ स्वीनिता लक्षणं संयुक्त याना सुवर्णया  
बिजय कलश गर्भे तया श्री करुणामययागु मूर्ति दयकल ।  
जुजुं वसपोल बिज्याकेत अन हे ईति धैगु थाय्या समीपस  
बुँ, कयब न्याना, तःबाहा बिहार दयका, वया दथ्वी देगः

दयके बिल । क्रमथ्ये लोकनाथयागु मूर्ति नं, देगः नं  
 दयके सिधसेलि बन्धुदत्त बज्राचार्य बौद्ध शास्त्रया  
 बिधानं १४ चतुर्दशाभिषेकं संस्कार यांना बिज्यात ।  
 हानं कार्य सिद्धिया निंति गणेश छह्य स्थापना यात ।  
 हानं ईखा धैगु थासे कौमारी छह्य नं बिज्याकल । थुलि  
 ज्या सिधसेलि बन्धुदत्त गुरुं ललितापुर देशस ह्लापा  
 जुया चोंगु पुलांगु थिति न्हेगु रथ जात्रा याय्गु दैचोंगु,  
 थ्व फुकं छगू यांना, श्री लोकनाथयागु रथ जात्रा छगू  
 जक याय्गु बिचारं समाधियोग यांना न्हेगु रथ  
 जात्राया देवतापि श्री लोकनाथया मूर्तिस साधना यांना  
 बिज्यात । थ्व बेलस खुगु रथ जात्राया देवतापि बिज्यात,  
 छगू रथ जात्राया जटाधारी लोकेश्वर छह्य बिमज्या ।  
 हानं चैत्य स्थापना यांना साधना यांना बिज्यात, चैत्य  
 पंम्हुया वना स्वप्नस क्यन, हानं आकाशबाणीं धया हल ।

हे साधकाचार्य ! पुलांगु थिती जिगु रथ जात्रा  
 छगू मिते याय् मते थथे आकाशबाणीं धया हःगु खँन्यना  
 तथाऽस्तु धका श्री लोकनाथ व जटाधारी निह्य लोकेश्व-  
 रयागु जक रथ जात्रा याय्गु यांना बिज्यात ।



## श्री लोकनाथ विज्याकेत गुरु बन्धुदत्त रथ दयकूगु प्रमाण

न्हापां ४ प्यंगु घःचाले न्हाणा आह्वान यानापि  
प्यह्य भैरवपिनिगु मूर्ति दुबिका । धःमाय् कर्कोटक नाग-  
राजा व नागराजाया गलः दुगुलिं मछाला कापते  
बिधनान्तकयागु मूर्ति चोया दुबिका बलि बिया चित्तबुद्धे  
याना गलः तोपुया बिल । हानं ३२ स्वीनिता लक्षणया  
प्रमाणं स्वीनिकु तथा त्रयोदश भुवनया प्रमाणं क्सित  
तथा, श्री लोकनाथया गुरु ध्यान मुद्रा अमिताभ, पद्म  
स्वरूप बाय्मो धकिया छोने बिज्याका, वया छोने  
परम महा गुरु श्री बज्रसत्त्व बिज्याका, षट्गति प्राणिपि  
उद्धार यायया लागी षडक्षरी मन्त्रया ध्वजा ब्वेका  
बासुकी, शेष नागादि नागराजापि जंगलः आदि जवे  
खवे न्ह्योने सालेगु खिपते दुबिका । थुगु रथे श्रीलोकनाथ  
विज्याकल ।



# रथे बिज्याकुगु दिन

नेपाले ललिते तिथौ प्रतिपदा

बैशाखशुक्ले दिने

श्रीलोकेश्वर देव रंम्य सुरथे

दृष्ट्वा विराजं ततः ॥

ते देवेऽसुरमानवाश्च भुञ्जगाः


कुर्वति यात्रां तदा ।

दाक्षिण्ये अमरापुरे दिशिगतं

बिघ्नादिकं शान्तयेत् ॥

बैशाख शुक्लया प्रतिपदा तिथि खुन्हु यले श्रीलो-  
केश्वर करुणामय सुलक्षणं युक्तगु रथे बिज्यागु देव, दैत्य,  
मनुष्य, नागादिपिसं खनाःसकलें वया, बिधिक्रमं पूजादि  
याना, देव लोक पिसं जवे, दैत्यलोकपिसं खवे जंगलः  
जोना, मनुष्य लोकपिसं न्ह्योने खिपः जोना  
साला, ऋषिश्वरादि गन्धर्ब किन्नरपिसं धूप थना, पंखां

गायका, बाजं थाना, प्याखं हुया, नाना मङ्गलोत्सव  
याना रथ जात्रा यात ।



प्रथम जात्रा, गुरु बन्धुदत्त बज्राचार्य माने यात ।  
द्वितीय जात्रा, नरेन्द्रदेव राजा माने यात । तृतीय जात्रा,  
रथचक्र भरिया प्रमुख सकसिन माने यात । चतुर्थ जात्रा,  
देव दैत्यादि, यक्ष राक्षस, भूत दक्कसिन माने यात । हानं  
श्व रथ जात्रास सुथे सुथे नित्य देव, दैत्य, ऋषिगणपि  
वया स्तोत्र बो वल श्व हे प्रमाणं आः गुजि बाहायपि

शाक्यवंशतः, चित्रकारित, न्यकूत तथा स्तोत्र बोनीगु  
थैया अद्यापि तकं चले जुया च्वन तिनि । उगु समये रथ  
जात्रा यल देशे ज्यावलाख्यो समेतया प्यया याना, जात्रा  
सीधय्का सकल लोकयात दर्शन बिद्या, बिघन दक्क  
शान्तयाना, दक्षिण दिशास अमरापुर बुँग देशे यंका  
बिज्यात । थन नं नरेन्द्रदेव राजां श्री लोकनाथ बिज्याकेत  
बुँ न्याना, माक्क खर्च याना, बिहार दय्का देवालय  
दय्का, वसपोलयात सदां नित्य पुजादि माःगु कर्म याना  
बिचाः याईपिन्त धन द्रव्य, बुँ तथा गुठी दय्का बिल ।  
हानं यल देशे तःवाहा बिहारे नं बिचा याईपिन्त  
धन द्रव्य, बुँ तथा गुठी दय्का बिल । हानं रथ  
जात्रास माक्क ज्या याईपि कर्मचारीतय्त माःगु  
बन्दोबस्थाया लागी माक्क बुँ तथा गुठी याना बिल ।  
थुगु प्रकारं वसपोलयात रंगंछाईपि ख्वप देशया न्यकूजु  
धैपित, प्रतिष्ठा पूजादि माक्क कर्म याईपि बन्धुदत्त  
गुरुया सन्तान पिन्त, भाडा माक्क बीपि नदोल देशया  
कुह्यातय्त, सुवा चोनेत रथंचक्र भरियाया सन्तानपिन्त ।  
हानं सदां स्थीरं भाव-भक्ति याना, भजन याईपिन्त  
समेत माक्क बुँ तथा गुठी दय्का बिल । हानं नरेन्द्रदेव  
राजायागु बुँ ज्या याना म्हे जुया चोपि नाला देशया  
किसानत सःता श्रीलोकनाथयात पञ्चामृत भोजन छाया

लिपा छिमि नय्गु धका माक्व बुँ बिया गुठि याना बिल । हानं सुबर्ण रूप्य नाना धातुया पूजा जोलं माःमाःगु बसुजा दय्का तैबिल । थथे सम्पूर्ण ज्या सिधयका सकल लोकपिसं धन्य-धन्य धाय्का गुरु, राजा भरिया सोम्हं कान्तिपुर येँ देशे गोपुच्छ पर्वतस वना, श्री स्वयम्भू दर्शन यानालि शान्तिपुरस वना गुरु शान्तिकर बज्राचार्यया चरणकमले भोपुया नमस्कार याना, थःपि वनागुनिसँ वयागु तकया जूगु, यानागु खँया बृतान्त बिन्ति याना बेला कया, थःथःगु थासे लिहाँ वना, परम आनन्दं चोना बिज्यात ।

थनंलि श्री शान्तिकर बज्राचार्य थः शिष्य बन्धुदत्त राजा, नरेन्द्रदेब, भरिया रथंचक्र थुपिं सोह्य वया श्रीलोकनाथ नेपाल देशे बिज्याके धुन घका धाःगु खँ न्यना, हर्षमान याना, ध्यानं थःपूर्व जन्मया पुत्र श्री लोकनाथ दर्शन याना आनन्दनं सामाधि योगस चोना बिज्यात ।

श्री लोकनाथ बिज्याकुसँलि तिनि नेपाल देशे बखत-बखते जल बृष्टि जुया, वामा पिनागुली नं पाके जुसँली वाया दुने जाकि दया, अन्न प्रसस्त जुल । देशवासी लोक पिनि दुःख म्दया, आनन्द जुल ।

थनंलि गुलिछि काल बिते जुया वसेली, छन्हुया दिने गुरु, राजा, भरिया सोम्हं श्री लोकनाथया न्ह्योने वना बन्धुदत्त बज्राचार्य करुणाष्टक धैगु स्तुत्वाप्रणम्य स्तोत्र (२५) नीन्यागू चरण थमं रचना याना बोने धुंका, आः जिगु आयुः मन्त, श्री करुणामयया शरिरे लिन जुया निर्वाण वनेगु बखत थ्यन धका मती तया, राजायागु खाःस्वया, धया बिज्यात ।

भो राजन् नरेन्द्रदेव ! आळी सकतां ज्या सिधल, छलपोलयागु हे जक ज्या छगू बाकि दनी, थव ज्या छगू नं छाया बाकि तया बिज्यायगु थौं हे याना बिज्याहुँ । थथे गुरुं धाःगु खँ न्यना जुजुं बिन्ति यात ।

भो गुरु ! जिगु ज्या ला छुं बाकि दु थें मचौं, छु ज्या बाकि दनी ? जि लोमना चोन ला, छलपोलं हे आज्ञा दय्का बिज्याहुँ । थथे राजां धाःगु खँ न्यना गुरुं धाल ।

भो राजन् ! छलपोलया लोमना चोन खइ । जि लोकनाथ साधना याना कलशे बिज्याका बले छलपोलया न्ह्यो वेका चोन लोकनाथ निको तक पिहाँ बिज्यासंलि सोकःयागु अवस्थाय् ज्या बिफल ज्वी धका जि छःपिन्त

चुल्यां ख्वाना बिद्या, उगु बखते छलपोलया मनं मनं  
 धाःगु दु । जिथें जाह्य राजायात हे थ्वं चुल्यां ख्वात ।  
 थ्वैत जि त्वाथला बीला धका धंगु मखुला ? थ्व छगू  
 ज्या बाकि दनी, मेमेगु ज्या फुकं सिधल खः । थ्व नं बाकि  
 तयेम्बाल, जि अपराधियात त्वाथला छ्वया बिज्याहुँ ।  
 थ्व खँ न्यना जुजु मछाला म्ये वांन्याना कोछुना बिचाः  
 याना धाल । अहो दैव ! थ्व गुरु ला साक्षात् मंजुश्रीया  
 अवतार खनी मने चोंगु खँ हे स्यू, धन्य-धन्य गुरु धका  
 चरणकमले भोपूया अनेक प्रकारं बिन्ति यात ।

भो गुरु ! कोटि बिन्ति क्षमा याना बिज्याहुँ ।  
 नीतिस धया तःगु दु । राजमत्ता, धनमत्ता, यौभनमत्ता  
 थुमिगु विश्वास मदु । उकीं जिगु मने राजमत्ता धनमतां  
 पिहाँवःगु खः, थुकी कोटि-कोटि जिगु बिन्ति क्षमा  
 याना बिज्याहुँ । थथे धका राजां अनेक प्रकारं बिन्ति-  
 यागु न्यना गुरु बन्धुदत्तं हानं धाल ।

भो राजन् ! मने वःगु कल्पना ज्या नं सिद्ध याय्माः  
 मया तले मने कल्पना दया हे चोनी । उकीं मयासे  
 मज्यू, जिके छुं बिवाद मदु । तर छलपोलं नाना माथनं  
 बिन्ति याना क्षमा फोन, अथ्य जूसां मनयागु कल्पना  
 मिते यायत जिगु नामं कूशयागु मूर्ति ह्य छह्य दय्का

त्वाथला बिज्याहुँ उलिनं खुशी । थथे गुरुं धाःगु न्यना  
जुजुं ह्लिला धाल ।

भो गुरु ! ज्या पायगु जिगु कर्तव्य मखु, अथ्य  
जूसां छलपोलयागु बचन शिरोपर याना मचाते ह्यितो  
थे जक जूसां जि याये धका जुजुं कूशं छपु कया गुरुयागु  
मूर्ति धका ह्य छह्य दयका भूमिस तया बिज्यात । उगु  
समये गुरुं थःगु जीव समाधि द्वारा कूशया मूर्ती दुबिका  
बिज्यात । जुजुं खड्गं प्रहार याना कूशया मूर्ति निकू  
दयमात्रं सद्गुरु बन्धुदत्त बज्राचार्य प्रलय जुया श्री  
करुणामयया जवगु पालिस लोन जुया निर्वाणपद लाना  
बिज्यात ।

थनंलि नरेन्द्रदेव राजां थथे गुरु प्रलय जुया बिज्यागु  
खना स्मृति होन जुया लिपा नुगः मछिका जि म्वाय् मयल  
धका अनेक प्रकारं बिलाप याना गुरु व लोकनाथया  
शरणे वना, जिनं छलपोलया चरणे शरण वये धका  
भावना याना सर्वभूत धैगु स्तोत्र (२४) नीप्यंगू चरण  
थमं रचना बोनालि दण्डवत् प्रणाम यायां अन हे  
प्राणत्याग याना श्री करुणामयया खवगु पालिस लोन  
जुया मोक्षपद प्राप्त जुल ।

हानं रथंचक्र भरियां अन गुरु, राजा निह्मं मृत्यु  
 जुया वंगु सोयो, आपालं बिलाप याना धाल । हा हा हे  
 देव ! गजों गुजोगु जुल्व धिक्कार-धिक्कार, देव समा-  
 तपिं गुरु, राजा मदयका जि छुं मस्यूह्य ज्यापु छह्य जक  
 म्वाना चोनाया छु प्रयोजन, जिनं सिना वने धका इच्छा  
 याना चरपतिपाद धेगु देव मनुष्यां स्तोत्र ( २५ ) नोन्यागु  
 चरण रचना याना बोनालि दण्डवत् प्रणाम याना, प्राण  
 त्याग याना श्री करुणामयया पद्मासने लीन जुया  
 मोक्षपद प्राप्त जुल ।

थनंलि स्वह्य महाबीर पुरुषपिसं प्राण त्याग याना  
 वंगु खना सकल लोकयां नुगः मछिका धन्य धन्य धका  
 प्रशंसा याना थुमिसं धया वंगु याना वंगु ज्या खँ लुमंका  
 श्री करुणामयागु रथ जात्रा चले याना भाव भक्ति तथा  
 नित्य पूजादि याय भाक्व कर्म याना, सकल लोकपि  
 उद्धार ज्वीमा धका आशिका याना चोन ।

दैय्दसं बुँगनिसें रथ जात्रा याय्गु सकलयात  
 थाक्वी धका १२ फिनिदैय् छको बुँगनिसें सालेगु याना,  
 मेगु दै पत्ति यत्त देशे ज्यावलाख्यो समेतयां प्यया  
 न्यायका, प्यन्हु दुखुनु ज्यावला ख्यले पूजा याना, रथं  
 वक्कया, खते बिज्याका, दक्षिणायणया प्रमाणं दक्षिण  
 दिशा सोका वुंग देशे यंकेगु याना, हानं बुँग देशं खते



बिज्याका, उत्तरायणया प्रमाणं उत्तर दिशा सोका यल  
देशे हया, तःबाहाले बिज्याका, बैशाख शुक्लया पारुखुनु  
रथे बिज्याका जात्रा याःगु बरदेव राजां धका सीके  
माल ।

## ज्यावलाख्यःया जात्रास पुतुलं कयनी गुया संक्षिप्त खँ

ज्यावलाख्यले पूजा खुन्हु रत्न थुना तःगु प्वाकलं  
कयनीगु कारण छाया धाःसा-भक्तपुर (खप) देशे  
मिखा स्यागुया वास याईम्ह निर्धन किसान (ज्यापु)  
बुढा छम्ह दु, छन्हु व थःगु ब्वी वनेत वःबले ब्राम्हण  
छम्हसँ न्यन । हे बृद्ध आवाजु ! छिं गन फाये तेना ?  
जिगु छेँ स्त्रीया मिखा स्याका चोन, याना याना वासलं  
मज्यू छि मिखाया वासः याईम्ह धाःगु न्यना, उकिं छितः  
छक्रः कयने धका सःतः वया, लेँ हे नाप लात थिक जुल,  
नु, आः हे फासँ ।

बुढां धाल- छिगु छेँ गन ? जि मिखाया वासः  
यायम्ह जा खः, बुँ वनेत वया, आः थन वासः नं मदु ।  
ब्राम्हनं धाल- बुँ फाय म्वाल जिगु छेँ फासँ नापं

बोना यंके, वासः कायके ह्य् धका मिजास याना बोना  
यन, तःदँहनस थ्यसैली हानं ब्राह्मणं धाल ।

हे बँद्यजु ! जि मनुष्य मबु, कर्कोटक नागराजा खः  
जिगु छेँ पुखुली दुने, छि ग्याना दी मते, मिखा तीसिना  
दिसँ, जि घय्पुना यंके, थथे धया बुढायात घय्पुना पुखुली  
कोत यना, सुवर्णया छेँ दुत यंका छगू थासे तया, साःगु  
अमृत तुल्यगु भोजन याकालि थःस्त्री नागिनी सःता  
क्यन ।

थ्व बेलस बुढा आश्रय जुया खछि सुंक चोना मनं  
श्री भैषज्य तथागत स्मरण याना धाल । भो गुरु  
भैषज्यराज तथागत जितः सुदृष्टि सोया बिज्याहुँ ।  
थुलि मनं धया जवगु ह्लायपंया लिउने लाहातीं ब्वेब्वे  
स्याना खिति त्वीका गुलि गुलि चिना ख्वांउगु लखे मिले  
याना भैषज्यराज धारणी बोना नागिनीया मिखास दुने  
थ्यंक तया बिल वं बोंगु धारणी थ्व खः ।

ॐ नमोभगवते भैषज्य वैदुर्य प्रभकेतु  
राजाय तथागतायार्हते सम्यक्संबुद्धाय  
तद्यथा ॐ भैषज्य भैषज्य महाभैषज्य  
सुभैषज्य परम भैषज्य स्वाहा ॥

थथे धारणी बोना न्हिछिया सोकः वास  
तयकुसैली सिद्धिया प्रभावं प्यन्हु पुला न्यान्हु दुबुन्हु,  
नागिनीया मिखा स्यागु रोग लाल भतीचा हे मन्त,  
निर्मल शुद्ध नेत्र जुल । थ्व बेलस नाग नागिनी निम्हं  
खुसि जुया धाल ।

हे बैद्यराज ! धन्य धन्य छि मिखा कने मजिया  
हीया चोने मफया, याना यानागु उपायं मजिया चच्छि  
चच्छि खोया दुःख बिया चोंगु, छि प्यन्हु वासः याःबले  
निर्मल ज्वीक लायका बिल, आः छितः जि छु बिया  
छ्वे, छितः छु माः जिके दुगु धैदिसँ निश्चयनं बी ।  
हानं नागिनीनं धाल, अहो धन्य धन्य ! थ्व बैद्यराज  
धात्थे दैव तुल्य खः याना यानागु उपायं मज्यूगु नेत्र  
रोग, प्यन्हु वासः याना निर्मल शुद्ध ज्वीक कायका  
बिल । भो स्वामि ! थ्वं धाःगु बिया बिज्याहुँ ।

उगु समये कर्कोटक नागराजाया फिना चोंगु  
हेरा मोति जरे याना तःगुलि ज्वारा ज्वारा चोंगु प्वाकलं  
खना थ्व बुढां वहे प्वाकलं छपाः जित ब्यूसा ज्यू, जि  
बुँ वने बले फिना वने धका धाल ।

थ्व बेलस नागराजा मुमुमुसु ह्लिला फिना तैगु

पवाकलं तोया धाल । भो बैद्यराज ! थ्व लंयात पुतुलं नं धायि । जि अतिकष्ट नया दय्का तैगु खः, छि फोन जि बीगु जुल, यंकादिसँ धका बिया, हानं मेगु धन रत्न नं बिया, धय्पुना पुखुलि थत हया, ह्वापा नाप लाःगु लेँ थ्यंक तया नागराजाँ धाल ।

हे बैद्यराज ! आमलं तोपुया यंकी, रत्न मणि जक थुना तयागु अमूल्यगु नाग बस्त्र खः, लालापित क्यने मते, थ्व खँ गनं कने नं मते, मेपिसं लोभ याना कायी, बिचाः याना ति, जि वने जुल धका धया बेला कया नागराजा लोप जुया थःगु थासे लिहाँ वन ।

थनंलि बुढा बैद्य छेँ थ्यसेलि जहानपिसं न्यन छ गन वना वया ? प्यन्हु न्यान्हु दत जिमिसं माला जुयागु सुनानं खना धाःमदु ।

बुढां धाल- हे मचात ! जि लेँ ब्राह्मण छहा नाप लात, वं जित बोना यंकल धका बृतान्त खँ कना छिपि पत्या मजूसा थ्व नागराजां बियाहःगु धन रत्न, पुतुलं सो धका क्यना चित्त बुझे यात ।

छन्हु व बुढाया नागराजां बियाहःगु पुतुलं फिना बुँ वन, मध्याह्न काले भूत छद्मसँ खना तार्जित सोया

मति-मतीं धाल । अहो ! श्व ज्यापुजा ब्वीँ ज्या यायत  
हे थाय् थासे हेरा मोति दुगु लं फिना ज्या यायिह्य,  
श्व लँ गन कया हःगु ज्वी न्यना सोये धका मनू  
जुया न्यन ।

हे आदाजु ! आमलं छं गन कै हैगु, तच्चोकं  
बांला, जितःब्यू जि मू बी ।

बुढां धाल-श्व लं जि नागयात वासः याना  
सिर्पाउ बिया हःगु, श्व लंया मू छं बीफै मखु, जि बी  
नं मखु । थथे बुढां धागु न्यना, भूतया लोभ वना, उखुनु  
सुं कलिहाँ वन, कन्हैखुन्हु ह्लापा लाक वया ब्वीँ सुला  
चोन । बुढाया व हे लँ फिना बुँ वल, ह्लिने ज्या यायां  
तांनोया लं तोता छथाय् द्यागिने तया, हानं ब्वीँ ज्या  
यात । सुला चोँह्य भूत तीजक वया लं काचाक्क कया  
बिस्यू वन, बुढां खना ह्यू वन लिलाके मफु, भूत  
छथाय् लोप जुया वन । बुढा निराश जुया थःत थमं  
धिककार याना धाल । ज्यापुया बुद्धि, हेरा मोति दुगु लँ  
फिना ब्वीँ ज्याया वैह्य, तोते खुनु माला, विनाश कारणे  
अमूल्यगु वस्तु फुत धका ऊसुकाः तया, खो खों छेँ वन ।  
मचातसें नं सीका बो बिल, दिक्क ज्वीका चोन ।

थनंलि कथःथेँ ज्येष्ठ मास थ्यन, यले श्रीकरुणा-

मयया रथ जात्रा याना, ज्यावला ख्यले थ्रंका, सोन्हु  
 दुखुनु रात्रिस मनुष्य लोकपि वया (दीप मालिका)  
 मत छ्वेका, चाकः मत तया, स्तोत्र बोना चाःहुला चोन ।  
 कर्कोटक नागराजा नं धःमा तोता, मनुष्ययागु रूप जुया,  
 उखे थुखे सोया चाःहुला चोन । खवपयाह्य बैद्य बुढा नं  
 वया, अन सोया द्यो चाःहुला चोन । थुगु समये भूतगणपि  
 नं मुना वया उखे थुखे सोया, मनूते नयेगु तोनेगु जोरे  
 याना हया दिका तःगु थासे वना, मखंक मखंक कया नया,  
 दुःख बिया जुल । मनूते थन सुं वःगु मखना, श्व नं मद्दु,  
 व नं मद्दु धका कल्लोल शब्द हाला अद्भूत चाया चोन ।

अले अन यलयाह्य वज्राचार्य छह्यसँ अवश्य थन  
 श्व कया नै जूपि मद मखु, मुज्वीः सो हे सोये धका  
 ताये आखे, ईका पःका कयाः मन्त्र बोना होला, ताडन  
 तया दिग्बन्धन याना बिसाल, भूतगणपि गनं वने मफया  
 खनेदया वल । थुगु मौकास पुतुलं खुया यंकूह्य भूत नं  
 व हे लं फिना, अन वैच्चंह्य ताडनया प्रभाबं वने मफया,  
 लेँ दना चोन । बुढां खना ब्वां वना काचाक जोना  
 जिगु लंकू खुया यंकूह्य चौर भूत श्व हे का आःतिनि  
 लातका छ भाजु, थौंला ह्यिगःला जि माला जुयागु,  
 आमलं तोता हकी, मखुसा कसा याय त्यल धका जोना  
 तल । सकसिनं छु छु धका सो वल लसकर तोपुल,

मनुष्य रूप जुया चोह्म कर्कोटक नागराजा नं अन हे सो वल ।

भूतं धाल- हे बुढा ! छं जितः तोती, श्व लं जि ब्वी थुया हैगु, छन्त छु धका बी, तोतेसा तोती मखुसा छं कसा नै धका निह्मसिया थिथि त्वात, मेपि भूततसें घेरा बिया चोन । मणिमय लंया प्रभावं भूतया बल दै चोन बुढायात कसायात । बुढा धे धे चुल, ग्वाहाली ग्वाहाली धका हाल । श्व बैलस मनुष्य रूप नागराजाँ तंपिकया ह्ला मुरकिचिना चौर भूतयात बेगं छ्छने छथु दाल, भूत सोचा चाहुला भूमिस गोतुल । मेपि भूतत ग्याना चिला वन । लिपा चौर भूत दनावया बित्तियात ।

भो मानव ! क्षमाया क्षमाया, श्व ज्यापुयात मणिमय लं बीगु लायक मजू । थुजोगु अमूल्यगु बस्तु ब्वी तोता ज्या याईह्म, अवश्यनं छन्हु खुं लुच्चातेगु ह्लाती लायी, उकीं जि मबिया खः । थथे भूतं धाःगु खँ न्यना मनुष्य रूप नागराजाँ धाल ।

हे भूत ! छं जितः ह्यस्यूला ? का सो छं जिगु रूप धका नागराजायागु रूप क्यन, अले हानं मनुष्ययागु हे रूप जुया धाल । हे भूत ! छं धाःगु खँला खः, तर जि छगू ज्याय् खुसि जुया श्व बुढा बैद्ययात आम पुतुलं सिरपा

बिःया है गुखः, आमलं छ भूतयात नं लायक मजू । न्ह्यागु हे जूसां जि बी धुन, छं याकनं तोता ब्यू । थथे नागराजाँ धाःगु बचन न्यना पूनर्वार भूतं बिन्ति यात ।

भो नागेन्द्र ! धन्य-धन्य छलपोल, छलपायोलके जिं छगू बिन्ति याये, न्यना बिज्याहुँ । छु धाःसा, आः थ्व रत्नमय पुतुलं व ज्यापुयात नं लायक मजू, जितः नं लायक मजू । उकिं वयात नं बी मखु, जित नं काय मखु, श्री करुणामययात द्वहलपे । नागलोकं पिहाँ वःगु बस्त्र सकल लोकयात वयने माः । थथे भूतं बिन्ति याःगु खँ न्यना नागराजाया नं, बुढा बैद्यया नं चित्तबुद्धे जुया अन दुपिं सकल लोकपिन्त थ्व खँ कनालि भूतं मणिमय पुतुलं तोता बिल ।

थनंलि कर्कोटक नागराजा, ज्यापु बुढा बैद्य, भूत थुपिं सोम्हं भिले जुया श्री करुणामय लोकनाथयात मणिमय हेरा मोति जरे याना तःगु पुतुलं चढे यात ।

थुगु समाचार न्यना बरदेब राजां सो वसेलि मनुष्य रूप कर्कोटक नागराजाँ राजा, प्रजा आदि अन दुपिं सकल लोकपित आज्ञा दयका बिज्यात ।

भो राजा प्रजादि, सकल लोकपिं ! थ्व नागलोकं



पिहांवःगु रत्नमय पुतुलं प्वाकलं देँ दँसं ज्यावला खयले  
जात्रा खुनु जुजु वया प्यंगू दिगसं कयने माल ।

ह्लापांगु— देव, मनुष्य, नागलोकयात कयने माल ।

निकःगु— येँ, यल, खप, तःदहने । निर्वाण जुया वसां  
बन्धुदत्त गुरु, नरेन्द्रदेव राजा, रथचक्र भरिया-  
यात व कर्कोटक नागराजायात कयनेमाल ।

सोकःगु— भूत, किसान बैद्य, भूतगणपिन्त ताडण तःह्य  
बज्राचार्य सहित लोकपिन्त, यक्ष लोके  
चोंपिन्त कयने माल ।

थथे धका सत्य वाचा याना, लोकपिन्त साछि  
तथा, किसान बैद्ययात, भूतयात, भूत कयंह्य बज्राचार्य-  
यात नं सन्तोष ज्वीक धन द्रव्य बिया, मनुष्य रूप  
कर्कोटक नागराजा लोप जुया वन ।

श्व भूत गन चोंह्य धाःसा— सुशील भैरवया थाय्  
ढौज्य क्षत्रे चोंह्य धका सीकी ।

थनंलि वाचा फपुला वसेंलि यक्ष लोकपिं आपालं  
वया पूजा यायमु तोहचिना श्री लोकनाथ हरण याना  
यंके धका वल । श्व बेलस श्री करुणामययागु पालिस  
लीन जुया बिज्याह्य गुरु बन्धुदत्त बज्राचार्यया मन्त्र

सिद्धियागु प्रभावं ३२ स्वीनिह्य देविपि प्रकट जुया  
लिना यंकल । श्व हे थिति, थौंया अद्यापि तकं चा चोनी  
खुन्हु, नकीं खाना देवी प्रवेश ज्वी मानी । कन्हे खुन्हु  
नं नागलोकया बस्त्र, हेरा मोति दुगु पुतुलं क्यनेगु  
थिति थौंया अद्यापि तकंक्यना चोन तिनी । श्व नाग बस्त्र  
दर्शन यानागुया फलं अष्टमहाभय तरे जुया वनी जुल ।

### वंशावली या प्रमाण

१२ वर्षया जलवृष्टि मजुया हाहाकारणं दुःख  
जुया च्वंगु कामुनि यक्षलोकस उद्धार याये निमित्ति नं  
सुखावती भुवनं क्वहां बिज्याना जन्म जुया उद्धार याना  
बिज्याकह्य संघनायक लोकेश्वर करुणामय खः ।

येँ देशयाम्ह पुज्यगुरु बन्धुदत्त बज्राचार्यः । जजमान  
खवप देशयाह्य नरेन्द्रदेव जुजु । कुवियेत भरिया यल  
देश याह्य ललित किशान । लें नापलाना सहायता  
ब्यूवह्य कर्कोटक नागराजा समेत प्यम्ह मिलेजुया—  
साधन याना भमःया रूप कलशे दुविका कयाह्य  
करुणामय यल देशे थापना जुल ।

भक्तपुर पद्मनाथ लोकेश्वर या खँ ।

वसपोल करुणामय खवप देशे बिज्याके धका  
नरेन्द्रदेवया पुत्र बरदेवजुनं दयेका तगु देवलस करुणामय

थापना याये मखना हाकनं मेम्हमूर्ति दयका पद्मनाथ  
लोकेश्वर धका नामकरण याना-कलिगत सम्बत  
३६०१स थापना यात जुल । थुगु बिहारया नाम  
जेतवर्ण बिहार धका प्रसिद्ध जुल ।

वर्तमान-थुगु थाय्यात भक्तपुर इताछें तोल  
लोकेश्वर बिहार धयातल । करुणामय यात लोकेश्वर  
धाइ । भक्तपुरया जनता पिसं लोकेश्वर यात-रसकर  
द्यः नं धाइ ।

सुनां थुम्ह श्री लोकनाथ करुणामययागु भाव भक्ति  
याना रथ जात्रास आदि नित्य सेवा याना पूजाभाव याई,  
वया थुगु जन्मस सुख सम्पति प्राप्त जुया अन्नयागु दुःख  
मदया लिपाया जन्मस मोक्ष वनीम्ह जुइ ।

थथे न्हापा न्हापा जुया वंगु ज्ञानी गुणिकपिसं च्वया  
थकूगु थ्व खँ आः जिं थन संक्षिप्त रूपं प्रकाश याना ।

थुलि श्री मदर्यावलोकितेश्वरया मणि मय वंशावली  
मालास श्री लोकनाथ करुणामय नेपाले  
हःगु खँ समाप्त जुल ।



## ललितपुरस करुणामयया रथस्यंगु खँ

(९३१) एक त्रिशत् नव गते बैशाख सप्तमा  
सोमवार दिने थ्व पर्यायस महाराजाधिराज श्री ५  
गोर्वाण युद्ध विक्रम शाहदेव, थुगु दन श्री करुणामय  
बुगनं सालाहर नुगल स यात न्याय्कल । थुगु थास रथ  
बांमलाक गुलि ल्लोन । चाकवाहादेवया आसितोक धुरो  
ल्लोनाव यात न्यायकर न्यायवं हानं तोकधुर-हानं ल्लोना  
साला व यंकर ।

भूमी चालदिनं कमल पाणिरथंच कृत्तिरियं  
सुन्दरा नन्द बिदुषः ।

भुजंग मवि लोचनक कलितेच वर्षे शनौ ।  
तिथौ दशहराभिधे उडूनि चापि चित्राभिधे । १ ।  
चचाल बसुधा तरास्फुटिता नेक प्रसा दिकाः ।  
अहो मरक दायकं कमल पाणि देहात् भुतम् । २ ।

भूमीकंप जूगु व करुणामयया रथ स्यना छःया  
खवानं स्यना देशोपद्रव जूगु खं — ललितपुरया पं.  
सुन्दरानन्दजुं चोयातगु ।

१२८ दशहरा तिथि शनिश्चरबार चित्रानक्षत्र थुखुनु महा भयानकं भूमि चाल जुयाव अनेक देवालय प्रासाद गृग सत मठ आदि दुन्याव अधिकं प्राणीपि लोकं प्रलय (मृत्यु) जुरो ।

श्री करुणामय रथ जात्रा वाकि दनिगुलि रथ जात्रास अनेक उपद्रव जुया द्यःया खा बोला वया थथिन्य निमित्तिनं उपद्रव जुया व लोक हाहाकार जुरो ।

वि.सं. २००१ ज्येष्ठ २९ गते बृहस्पतिवार तृतीया खुनु करुणामयया रथ साला लगंख्यले यंकुवले तंगले थ्यनेवं रथ गोतुल द्यः लिमकास्ये रथ वांलाका न्हेनु खुन्हु साला या न्यायकल ।

ने.सं. १०८९ (बि.सं. २०२६) बैशाख शुक्ल षष्ठी बुधवार ज्येष्ठ ११ गते करुणामयया रथ नुग तोले कोदला द्यः कोकया लुं हितिफुसे फले चास तथा १६ दिनं रथ तयार जुइका साला जात्रा सिधय्कल ।

ने.सं. १०९० (बि.सं. २०२७) बैशाख शुक्ल सप्तमी मंगलबार १९ गते नुगले साला यंकूगु हःखा तोले थ्यंबले रथ खःवे पाखे भोःमुला साले मजिया

द्यःकोकया सौग हितिफुसे फलेचास तथा रथ देका तयार याना ज्येष्ठ ३० गते अष्टमी दिन १० बजे रथे द्यः बिज्याका ३१ साला नुग जात्रा सिध्यकल ।

ने.सं. १०८८ (बि.सं. २०२५) पूलचोके द्यः रथे तयत रथ सिमधरा धकिं वाय्मो तय् मधुवं करुणामय रथे बिज्याका सावीक मामागु याना गाबाहा नुग जात्रा धुंका लगंजात्रा याय्त साला यंकुगु लगंख्यो भतीचा मथ्यवं रथस्यना खवेपाख्ये कर्णाकिर बैद्ययाछें रथ भोसुना साले मजिया द्यःकोकया न्हवं याइगु दबुया कोसं थाय् देका द्यः तल । रथ मर्मत याना सिधेका बैशाख कृष्ण तृतीया बुधबार ज्येष्ठ २ गते सुथे द्यः रथे बिज्याका साला या न्याय्का ५ गते लगंजात्रा माने यात तस्सकं वा वया वहनी नैक्या लुइगु ज्या जुल ।

श्री ५ वीरेन्द्र जुजुया पर्याय ने.सं. १०९९ (बि. सं. २०३६) स १२ वर्षया पर्वकाल करुणामय रथ जात्रा बुगं सालाहया गावाहा जात्रा धुंका नुग जात्रा माने याय्त साला यंकूगु बैशाख २६ गते बृहस्पतिबार त्रयोदशी तिथि खुनु नुगटोल भतीचा मथ्यवं रथ लिकथं चातुला वंगुलि साले मजिया द्यः कोकया लुंहिति फुसे फले चास तथा रथ पिया हानं दय्कल ।

ज्येष्ठ २४ गते रथ तयार याना रथे द्यः बिज्याका शान्ति स्वस्तियाना २५ गते साला या न्याय्का २६ गते भुजया जात्रा सिधय्कल । २७ गते ज्येष्ठ पुन्हीखुनु लगंख्येले छनु हे या न्याय्का लगंजात्रा सिधेकल ।

अनंलि आषाढ लछि लगंख्येले तयाश्रावण ५ गते ज्यावलख्येले साला यंका तफा लोहंते दिका ६ गते या न्याय्का प्यन्हु खुनु ९ गते ज्याबल जात्रा सिधय्का साला जुद्ध शं. या छे न्ह्योने दिकल । अनं १० गते साला यंका भनि मण्डल थ्यन । ११ गते साला भतीचा क्वे तय्हल ।

१२ गते शनिश्चरबार खुनु साला यंका क्वय्गु ख्यो धाथाय् ले थ्यंबले खवे पाख्ये रथ गोतुला ख समेत फातापुला रथ क्यवे आनन्दं द्यन । उखुनु हे द्यः लिकया न्यखुस फलेचाय् बिज्याकल ।

रथ स्यंका हानं दय्का भाद्र १३ गते षष्ठी मंगल-बार खुनु रथ तयार याना द्यः रथे बिज्याका १४ गते सालायंका न्यखु तीर्थे १२ बजे दिका ३ बजे अनं साला खुसिपुला च्वे थ्यंबले जवे पाखे घःचा ब्वाना बुइ घःकू छह्यायात तुति घचालं क्यला कन्हे खुन्हु मृत्यु जुल । कन्हे खुनु सालायंका भाद्र १८ गते बुगमती या न्याय्का प्यन्हु खुनु २१ गते साबीक द्यः या लं क्यना जात्रा सिधय्कल ।

## लेखकया प्रकाश जूगु सफूत

|                                         |    |
|-----------------------------------------|----|
| बुद्ध-वृष जन्म कथा . . . . .            | १  |
| सूर्योदय राजाया कथा . . . . .           | २  |
| स्तोत्र दर्पण . . . . .                 | ३  |
| नेपाल वर्ष क्रिया . . . . .             | ४  |
| बुँगद्यो नेपाले हःगु वंशावली . . . . .  | ५  |
| गुणवती कथा . . . . .                    | ६  |
| नेपाल भाषा देव स्तोत्र . . . . .        | ७  |
| अन्त्य शान्ति क्रिया पुस्तकम् . . . . . | ८  |
| सर्वानन्द नृप जातक . . . . .            | ९  |
| सुरदत्त कथा . . . . .                   | १० |
| नेपाल तीर्थ व्रत . . . . .              | ११ |
| महायान बुद्ध-धर्म दर्पण . . . . .       | १२ |
| आर्य तारा स्तुति परित्राण पाठ . . .     | १३ |
| द्वादश तीर्थ व्रत . . .                 | १४ |
| मल्ल कालीन गँ प्याखँ . . .              | १५ |
| बोधि सत्वावदान माला भाग -१              | १६ |
| "        "        "                -२   | १७ |
| "        "        "                -३   | १८ |

सफू काय्गु थाय्ः--

लेखक ब प्रकाशकः

पं. चै. आशाकाजी वज्राचार्य

ललितपुर, अथननि ।